

Milik Departemen P dan K  
Tidak diperdagangkan  
Untuk umum

# Hikayat Malem Dagang

H.K.J. Cowan



Departemen Pendidikan dan Kebudayaan



# Hikayat MALEM DAGANG

Susunan  
H.K.J. COWAN

Departemen Pendidikan dan Kebudayaan  
PROYEK PENERBITAN BUKU SASTRA  
INDONESIA DAN DAERAH  
Jakarta 1980

Diterbitkan oleh  
Proyek Penerbitan Buku Sastra  
Indonesia dan Daerah

Hak pengarang dilindungi undang-undang

PERPUSTAKAAN  
DIT. SEJARAH & NILAI TRADISIONAL

Nomor Induk : 1044/83  
Tanggal terima : 21-6-1983  
~~Pem/bantuan dari~~ Proyek Penerbitan Buku Sastra  
Nomor buku :  
Kopiksa : 2.

## KATA PENGANTAR

Bahagialah kita, bangsa Indonesia, bahwa hampir di setiap daerah di seluruh tanah air hingga kini masih tersimpan karya-karya sastra lama, yang pada hakikatnya adalah cagar budaya nasional kita. Kesemuanya itu merupakan tuangan pengalaman jiwa bangsa yang dapat dijadikan sumber penelitian bagi pembinaan dan pengembangan kebudayaan dan ilmu di segala bidang.

Karya sastra lama akan dapat memberikan khazanah ilmu pengetahuan yang beraneka macam ragamnya. Penggalian karya sastra lama yang tersebar di daerah-daerah ini, akan menghasilkan ciri-ciri khas kebudayaan daerah, yang meliputi pula pandangan hidup serta landasan falsafah yang mulia dan tinggi nilainya. Modal semacam itu, yang tersimpan dalam karya-karya sastra daerah, akhirnya akan dapat juga menunjang kekayaan sastra Indonesia pada umumnya.

Pemeliharaan, pembinaan, dan penggalian sastra daerah jelas akan besar sekali bantuananya dalam usaha kita untuk membina kebudayaan nasional pada umumnya, dan pengarahan pendidikan pada khususnya.

Saling pengertian antardaerah, yang sangat besar artinya bagi pemeliharaan kerukunan hidup antarsuku dan agama, akan dapat tercipta pula, bila sastra-sastra daerah yang termuat dalam karya-karya sastra lama itu, diterjemahkan atau diungkapkan dalam bahasa Indonesia. Dalam taraf pembangunan bangsa dewasa ini manusia-manusia Indonesia sungguh memerlukan sekali warisan rohaniah yang terkandung dalam sastra-sastra daerah itu. Kita yakin bahwa segala sesuatunya yang dapat tergali dari dalamnya tidak hanya akan berguna bagi daerah yang bersangkutan saja, melainkan juga akan dapat bermanfaat bagi seluruh bangsa Indonesia, bahkan lebih dari itu, ia akan dapat menjelma menjadi sumbangan yang khas sifatnya bagi pengembangan sastra dunia.

Sejalan dan seirama dengan pertimbangan tersebut di atas, kami sajikan pada kesempatan ini suatu karya sastra daerah Aceh,

dengan harapan semoga dapat menjadi pengisi dan pelengkap dalam usaha menciptakan minat baca dan apresiasi masyarakat kita terhadap karya sastra, yang masih dirasa sangat terbatas.

Jakarta, 1980

Proyek Penerbitan Buku Sastra  
Indonesia dan Daerah

## RINGKASAN

### HIKAYAT MALEM DAGANG

Sultan Iskandar Muda memerintah dengan adil. Negerinya aman dan makmur. Barang-barang keperluan rakyat melimpah ruah. Kapal-kapal asing banyak berdatangan membawa barang. Pada suatu hari datanglah Raja Raden bersama putri Pahang menghadap Sultan. Mereka datang dari Banang, Malaka dengan maksud hendak memeluk agama Islam. Raja Raden juga mengatakan bahwa ia mempunyai seorang adik bernama Raja Si Ujut. Sesudah memeluk agama Islam putri Pahang dinikahkan dengan Sultan Iskandar Muda dan Raja Raden dinikahkan dengan adik Sultan sendiri.

Tiada berapa lama kemudian datanglah Si Ujut dengan armadanya yang besar yang terdiri dari tujuh buah kapal perang. Si Ujut seorang raja terkenal. Beberapa kerajaan takluk di bawah kekuasaannya. Ketika kapal-kapal perang itu sudah merapat di pelabuhan, putri Pahang memerintahkan rakyat untuk menyambutnya dengan upacara adat. Si Ujut diterima di istana kerajaan. Kedatangannya ialah hendak membujuk Raja Raden supaya pulang kembali ke Malaka. Raja Raden tidak mau dibujuk dan mengatakan ia sudah masuk agama Islam dan Sultan sangat setia kepadanya. Si Ujut mengancam kalau Raja Raden tidak mau pulang negeri Aceh akan diperanginya dan rajanya dibunuh. Raja Raden menasihati Si Ujut supaya jangan takabur, padahal Sultan sudah berbaik hati kepadanya dengan memberi izin menguasai daerah Ladong, Peukan dan Krueng Raya. Mendengar nasihat abangnya Si Ujut marah. Ia pergi ke daerah pantai. Rakyat dirampok. Ladong dan Krueng Raya dibumihanguskan. Dua orang pawang ikan dibunuh. Raja Raden memutuskan hubungan saudara dengan Si Ujut, dan menganjurkan Sultan supaya mempersiapkan armada yang besar untuk memerangi Malaka. Sultan mengerahkan seluruh rakyat mencari kayu di gunung untuk pembuatan kapal.

Dalam waktu tujuh bulan tujuh ratus kapal selesai dibuat.

Setahun sejak peristiwa itu terjadi sebatang kayu besar terdampar di tepi pantai. Sultan sendiri menyaksikan kayu besar itu. Kayu itu menyatakan bahwa ia sebenarnya jin Islam. Si Ujut yang menebangnya dan hendak dijadikan kapal untuk memerangi Aceh. Jin itu meminta supaya Baginda segera membuat sebuah kapal dari kayu itu. Kapal itu nanti akan dapat menaklukkan setiap negeri. Tukang-tukang pun dikerahkan dan tak lama kemudian kapal pun selesai dengan dilengkapi tiga buah genta. Yang satu ditempatkan di haluan dan diberi nama Akidatoi Umu. Yang satu di buritan dengan nama Tulak Mara. Yang satu lagi di tengah-tengah kapal dan diberi nama Kasira Khairan. Kemudian Baginda memberi nama kapal itu dengan Cakra Donya. Ketika diluncurkan rakyat beramai-ramai menariknya tetapi tidak bergerak. Baru sesudah Baginda meminta para ulama membaca doa, kapal itu mau meluncur.

Dalam rencana memburu Si Ujut Baginda meminta pendapat putri Pahang. Putri mengatakan bahwa ada tiga hal yang harus di perhatikan oleh Baginda dalam penyerangan ke Malaka. Pertama harus diingat bahwa arus di perairan Malaka sangat deras. Kedua di Asahan. Di sana banyak lawan. Ketiga ialah di laut Banang. Di situ meriam tidak boleh dibunyikan sebab dua orang wali yang mula-mula memiliki negeri itu bersemayam di situ. Setiap meriam yang dibunyikan akan patah dua.

Armada Sultan Iskandar Muda berlayar menuju Malaka. Baginda sendiri berangkat melalui darat. Di Sigli Sultan disambut rakyat Pidie dengan panglimanya Maharaja Indra. Pidie sudah siap dengan lima buah kapal perang. Baginda memerintahkan supaya kapal-kapal perang Pidie mengikuti Cakra Donya. Dari Sigli Sultan melanjutkan perjalanan ke Meureudu. Ternyata Meureudu kosong. Penduduknya sedang bekerja di hutan. Baru sesudah tujuh hari mereka pulang. Dengan disertai seorang ulama bernama Ja Pakeh mereka menghadap Sultan. Mula-mula Sultan tidak mau menerima kedatangan mereka. Ja Pakeh marah, tetapi kemudian ia dipanggil lagi dan ditanyakan mengapa baru tujuh hari rakyat pulang dari gunung. Ja Pakeh mengatakan bahwa sebabnya ialah

karena Sultan tidak mengangkat seorang hulubalang di Meureudu. Tetapi Sultan beralasan bahwa Meureudu adalah daerah raja sendiri. Ja Pakeh diminta Sultan supaya ikut ke Malaka. Anak negeri yang tidak ikut terutama wanita oleh Sultan diberi modal untuk usaha menenun kain. Beberapa hari kemudian datanglah rakyat Samalanga yang sudah siap dengan lima buah kapal perang untuk mengikuti Cakra Donya memburu Si Ujut. Baginda melanjutkan perjalanan melalui Peudada. Di Peusangan rombongan Sultan disambut rakyat jelata. Peusangan juga mempunyai lima buah kapal perang. Kapal-kapal itu pun diperintahkan untuk mengikuti Cakra Donya. Rakyat Peusangan tidak ikut ke Malaka. Mereka sibuk memelihara ulat sutra. Kemudian Sultan sampai di Lhok Seumawe. Ja Pakeh menceritakan asal-usul nama Lhok Seumawe. Tempat itu menjadi dalam karena pasirnya banyak diambil oleh Brahim Papa. Demikian pula nama Pase yang berasal dari nama seekor anjing kepunyaan Brahim Papa.

Sampai di Jambo Aye Sultan baru memikirkan calon Panglima Perang. Panglima Pidie Maharaja Indra tidak bersedia dengan alasan tidak memiliki banyak ahli famili. Baginda mencalonkan Malem Dagang yaitu cucu Ja Pakeh sendiri tetapi Ja Pakeh tidak setuju karena ia masih sangat muda. Baginda tetap pada pendiriannya karena menurut beliau panglima muda ini sangat tepat untuk diserahi pimpinan perang, dengan janji Malem Dagang akan diberi daerah yang luas meliputi Asahan, Meulaboh dan Tripa. Malem Dagang menanyakan pendapat panglima-panglima yang lain. Semuanya menunjuk Malem Dagang. Ja Pakeh pun memberi semangat perang suci melawan musuh agama.

Sesudah pengangkatan di Jambu Aye, pasukan Sultan Iskandar Muda di bawah pimpinan Malem Dagang menuju kapal dan berlayar. Tiga hari tiga malam dalam pelayaran sampailah armada besar itu di Asahan. Negeri Asahan diperintah oleh seorang raja yang belum beragama, namanya Raja Muda. Banyak negeri yang sudah ditaklukkan dan banyak putri raja serta harta-benda dirampasnya. Sultan memerintahkan Malem Dagang membunyikan meriam. Di darat terdengar tujuh belas kali tembakan meriam pertanda negeri Asahan akan dihadang. Utusan Raja Muda mene-

mai Malem Dagang di atas kapalnya dan menanyakan maksud kedatangan armada Iskandar Muda itu. Malem Dagang mengatakan bahwa armadanya sedang menuju negeri Johor. Meskipun telah disarankan oleh utusannya supaya armada Malem Dagang jangan dihadang, namun Raja Muda tetap hendak menyerang. Raja Muda mengerahkan pasukannya. Armada Malem Dagang ditembakinya dari darat selama tujuh hari. Mula-mula Sultan Iskandar Muda menyarankan jangan melawan karena akan menghadapi Raja Si Ujut. Tetapi Malem Dagang dengan sembilan ratus kapal perangnya ingin melawan Raja Muda.

Armada Malem Dagang mulai menembakkan meriamnya ke darat. Satu per satu benteng Raja Muda rubuh, namun beberapa orang perwira Malem Dagang mulai takut. Malem Dagang menyuruh pilih tewas dalam pertempuran sebagai pahlawan atau mati dalam keadaan lari. Mereka bertekad kembali melanjutkan perang. Pasukan mendarat dan meskipun banyak korban, akhirnya semua benteng dapat direbut, kecuali benteng istana yang tangguh. Mereka ngeri melihat benteng itu. Ja Pakeh berdoa agar pasukan Malem Dagang dapat merebut benteng yang penuh dengan rintangan itu. Dipimpin oleh Malem Dagang sendiri dengan bantuan Raja Raden dan Panglima Pidie akhirnya benteng istana dapat ditaklukkan. Pasukan Raja Muda kucar-kacir. Yang selamat lari ke gunung-gunung termasuk Raja Muda sendiri. Malem Dagang memerintahkan menyita lima ribu pucuk senapang peninggalan pasukan Asahan untuk dibawa ke kapal. Demikian pula harta rampasan lainnya. Ketika Malem Dagang memasuki ruangan istana ditemuiinya seratus orang istri Raja Muda sedang menangis. Malem Dagang memperingatkan para perwiranya agar tidak tergoda oleh wanita-wanita cantik itu. Ia mengingatkan bagaimana nasib sendiri kalau kalah perang istri diambil orang. Malem Dagang menawan permaisuri Raja Asahan yang bernama Putri Keumala Donya.

Sesudah tiga hari beristirahat Sultan menyarankan agar perjalanan tidak dilanjutkan. Sebaiknya menunggu Si Ujut dengan membangun benteng di Pulau We. Tetapi Malem Dagang bertetap hati untuk melanjutkan pelayaran ke Malaka. Sesudah tujuh hari permaisuri di laut Raja Muda beserta rakyatnya turun dari gunung.

Mereka menyangka semua wanita dibawa pasukan Malem Dagang. Raja Muda masih menemukan istri-istrinya. Hanya Keumala Donya yang tidak ada. Dengan membawa sejumlah emas dan bawaan-bawaan lainnya sebagai tebusan Raja Muda menghadap Malem Dagang di atas kapal. Malem Dagang menolak tebusan. Keumala Donya akan dikembalikan jika Raja Muda mau memeluk agama Islam. Keumala sendiri sebenarnya ingin mengikuti Malem Dagang ke Aceh. Setelah memeluk agama Islam Putri Keumala diminta oleh Malem Dagang untuk mengikuti suaminya yang baru memeluk agama Islam pulang ke Asahan. Sebelum turun dari kapal Putri Keumala memberikan sebentuk cincin kepada Malem Dagang. Cincin itu berkhiasat sebagai pengawet jenazah.<sup>1</sup> Apabila ada orang yang mati dalam peperangan cincin itu dimasukkan ke dalam mulutnya untuk mencegah pembusukan. Dipesannya pula supaya sewaktu Malem Dagang singgah di Asahan.

Armada Malem Dagang melanjutkan pelayarannya, dan tujuh hari kemudian sampai di Malaka. Di Kuala Banang armada Malem Dagang beristirahat. Sultan mengingatkan Ja Pakeh akan pesan Putri Pahang agar tidak membunyikan meriamnya di tempat itu. Pada suatu hari Malem Dagang bertemu dengan ayah Putri Pahang dan sesudah dipertemukan dengan Sultan, ayah Putri Pahang menceritakan tentang kejahatan Si Ujut dan ia bersedia membantu Sultan tetapi beliau menolak tawaran itu. Oleh karena Si Ujut sudah pergi ke Johor Lama, maka Sultan dengan beberapa kapal perang menuju ke sana.

Sesampai di Johor Lama meriam dibunyikan tetapi tidak ada balasan dari darat. Ternyata Si Ujut sudah pergi ke Johor Bali dalam rangka persiapan hendak menyerang negeri Aceh. Di pantai Johor Lama Sultan membangun tujuh buah benteng yang kukuh.

Sesudah tujuh belas bulan armada Sultan di Johor, armada Si Ujut muncul di Laut Banang. Malem Dagang minta izin kepada Ja Pakeh untuk menyerang. Ja Pakeh menasihatinya untuk bersabar dua tiga hari dan disuruh masuk ke dalam kamar untuk sembahyang dan membaca Quran. Ja Pakeh memerintahkan seorang utusan untuk memberitahukan kepada Sultan di Johor bahwa armada Si Ujut sudah berada di Kuala Banang. Malem Dagang

mohon izin dari Sultan tetapi beliau menyerahkan hal itu sepenuhnya kepada Ja Pakeh. Sesudah Ja Pakeh memberi izin, Malem Dagang memakai seragam perang lalu mulai menembakkan meriamnya ke arah kapal-kapal Si Ujut, disusul oleh Raja Raden dan Panglima Pidie. Berpuluhan-puluhan kapal Si Ujut tenggelam. Pasukan Si Ujut tidak menyangka bahwa yang menyerang mereka pasukan dari Aceh. Disangkanya serangan itu datang dari Banang sendiri. Panglima armada itu ialah mertua Si Ujut sendiri yaitu raja negeri Guha bernama Modeulikah. Si Ujut sendiri masih berada di negeri Guha. Sementara itu angkatan laut Malem Dagang terus menyerang. Dalam serangan itu Raja Modeulikah tewas dan banyak kapalnya yang tenggelam. Sisanya sepuluh buah kapal melarikan diri ke Guha. Tak lama kemudian Si Ujut mengetahui bahwa mertuanya telah meninggal. Demikian pulaistrinya Putri Beuruhut amat sedih mendengar ayahnya telah tewas. Si Ujut sangat marah dan dengan segera mengeraahkan seluruh rakyatnya. Tiga bulan kemudian berlayarlah armada Si Ujut menuju Laut Banang. Sampai di sana mereka mengepung armada Malem Dagang dari segala jurusan. Malem Dagang memberi semangat kepada pasukannya. Perang laut pun meletus. Malem Dagang bekerja-sama dengan Raja Raden dan Panglima Pidie memimpin pertempuran. Sebegitu banyak kapal Si Ujut yang tenggelam sebegitu pula datang yang lain menggantikannya. Berkat doa Ja Pakeh tidak satu pun kapal Malem Dagang yang tenggelam. Panglima Pidie merasa ajalnya sudah tiba. Ia meminta pakaian Ja Pakeh. Pertempuran terjadi di atas kapal. Si Ujut mencari Ja Pakeh. Ketika melihatnya ia terus melepas tembakan, ternyata Panglima Pidie yang terkena dan tewas seketika.

Sudah tiga bulan perang berkecamuk. Si Ujut mulai kewalahan. Pasukannya lari, hanya tinggal ia sendiri dengan sebuah kapalnya. Malem Dagang naik ke kapal Si Ujut dan berhadapan langsung dengannya. Dengan pedang di tangan ia menantang Malem Dagang. Dalam perkelahian itu Si Ujut dapat ditawan dan dalam keadaan dirantai ia dibawa kepada Sultan.

Armada Sultan Iskandar Muda meninggalkan Laut Banang pulang ke Aceh. Ketika ayah Si Ujut yaitu Raja Malaka mengeta-

hui bahwa anaknya sudah tertawan ia pun melarikan diri bersama pengikutnya ke gunung. Sesampai di Asahan Armada Sultan disambut dengan meriah oleh Raja Muda. Sebulan lamanya Sultan beristirahat di Asahan. Si Ujut yang tidak beragama itu dibujuk oleh Sultan supaya memeluk agama Islam tetapi ia tetap menolak. Armada Sultan melanjutkan pelayaran, dan dalam waktu tujuh belas bulan sampailah di Aceh yang disebut Pulau Ruja. Di sana Si Ujut dijatuhi hukuman mati tetapi tiada senjata yang dapat menghabiskan nyawanya. Dia sendiri yang memberitahukan bahwa ia akan mati dengan dimasukkan timah panas ke dalam mulutnya. Dengan cara itulah raja Johor dari Guha itu meninggal. Semua pasukan pulang ke tempatnya masing-masing dan Baginda amat puas dapat mengalahkan musuhnya.

Jakarta, 1 April 1982

Diringkaskan dari  
Naskah berbahasa Aceh  
oleh

Drs. Ramli Harun

Hikayat  
**MALEM DAGANG**

## HIKAYAT MALEM DAGANG

Bismillahirrahmanirrahim

Ajaeb Subhanallah

Tango kukisah raja-raja

Layeue keurajeuen Meukuta Alam

Raja jimeunan Iskandar Muda

Pote ade amat sangat

Peutimang rakyat ban sigala donya

Meung rukon meuh muplo kuyan

Han sapeue tan di sroepada

Padum-padum gleueng ngon subang

Meuribee pasang pi hale na

Padum ija itam puteh

Nyang that leubeh ija boseuta

Jineh keumukha ngon sukaleuet

Ija sungket hana teukira

Jineh hamee ngon Aseuhan

Laen nibak nyan muplo nyang gasa

Meujeujineh laen nibak nyan

Han sapeue tan di Po Meukuta

Bak masa nyan rame pi that

Peue nyang hajat dum hale na

Nanggroe pi luah banda pi rame

Han meune-ne keunan teuka

Padum-padum kapai jak meukat

Dumpeue alat pi na jiba

Padum-padum kapai di Kleng

Jime bakong beusoe meulila

Padum kapai Meulabari

Ngon Gujurati ngon Beunggala

Padum teuma kapai Pigo  
Habeh meusaho ngon kuangkang Cina  
Padum gurab nyang di Bintan  
Ngon surohan nibak raja

Padum-padum behtra di Anggo  
Jipeudieng malo ngon keusumba  
Padum kapai nyang me cawan  
Krikai dulang pingan raya

Padum-padum kapai di Keudah  
Ija mirah meueneukat jiba  
Tunong baroh timu barat  
Dumpeue alat pi na jiba

Di Aceh kon troh u barat  
Meusyeuhu that Po Meukuta  
Padum lawet neukeurajeuen  
Sapeue pi tan na mumara

Amma Bakdu dudoe nibak nya  
Teuka Putroe Phang geuba keuraja  
Troph keu geuba nyan Putroe Phang  
Habeh meuguncang alam donya

Yoh nyan sajan ngon Raja Raden  
Ureueng get baten teungoh seutia  
Leugat geutamong nyan u dalam  
Ngadajunjongan Meureuhom Meukuta

Kri cit narit Meukuta Alam  
Raja jimeunan Iskandar Muda  
Neumarit bak ureueng dua droe  
Neutanyong nanggroe neupareksa

Netayong nan neutanyong biek  
Pakri ban teutiek u Pulo Ruja  
Lon teumanyong wahe adoe  
Pane nanggroe keunoe tateuka

Teuma seuot ureueng dua droe  
Neuareutoe neupeuhaba  
Tuanku ampon deelat jeunulang  
Di nenggroe Banang kamoe teuneuka

Meujeumeurang laot tujoh  
Uroe nyoe troh bak sroepada  
Raja Raden nama ulon  
Nyan keu tuan geuseubut nama

Syeedara ulon Raja Si Ujut  
Nama geuseubut di atueh donya  
Kamoe nyang troh keunoe meujak  
Meukeumeung meusyahdat tamong agama

Gaseh sayang tuanku ampon  
Bak neutem peulon kamoe dua  
Kru seumangat adoe meutuah  
Namiet Poteu Allah geutanyoe dumna

Tamong Iseulam Raja Raden  
Ureueng get baten teugoh seutia  
Nyan keu tanda jiiseulam  
Jibri Putroe Phang teuma keu raja

Oh lheueh Iseulam Raja Raden  
Neupeukawen ngon syeedara  
Teuma neupulang teumpat meuneuen  
Neubri mideuen ngon astana

Neubri dendayang ngon meuligoe  
Bak duek putroe deungon raja  
Na padum treb dudoe nibak nyan  
Si Ujut keunan teuma jiteuka

Yoh nyan jiteuka di nanggroe jeuoh  
Kapai tujoh sajan jiba  
Limong boh kapai mubajee beusoe  
Barang ri nanggroe ek jirada

Dua boh kapai mubajee pirak  
Ho nyang tajak tihang suasa  
Binteh bukot that meulo-lo  
Meuh sinadoe dum peurmata

Taloe teumirang pirak seuntagi  
Ladom jiseundi ngon suasa  
Meung keumudoe that meuhalak  
Onji pirak bak suasa

Kapaiji tuan that meudeune  
Tujoh boh bale lam gumtia  
Limong boh nanggroe sidroe jigeunggam  
Lhee are jra itam rukon peutua

Sireutoh sikureueng ploh raja di baroh  
Jih nyang boh-boh barang jan masa  
Kapai jidong ka rab u lhok  
Rab meutajo u mieng kuala

Piha areh nyan Putroe Phang  
Putroe jeunulang ahloji bicara  
Jiyuee tron rakyat jareueng jareueng  
Jiyue ampeueng ngon bala tantra

Neuyue me u deungon teubee  
Meung boh kayee han teukira  
Nyan keu putroe that gunawan  
Meung hidangan meuleulaksa

Oh sajan troh nyan geupeurab  
Ma geudeelat dumgeun rata  
Laloe geucok ngon hidangan  
Jineh makanan nyang catirasa

Oh sajan lheueh jipumajoh  
Laloe geuboh di ateueh geuta  
Lheueh nyan geupeuteungoh keu u darat  
Geubri teumpat jimeuseuninya

Geubri ladong nyān ngon peukan  
Teuma sajan ngon Krueng Raya  
Dudoe geuba u meuligoe  
Geupeudeuk dudoe di ateueh geuta

Geubri silueue nyang meujunggi  
Bajee di asœ lhee blah dok ma  
Geubri ija that meusanjak  
Neudong pirak teuneun suasa

Geubri bungkoh tapak cato  
Deungon boh rue meuh bungong gisa  
Geubri kupiah meuh sinaroe  
Peuleumah budoe peuneuget rata

Padum lawet jih disinan  
Sapeue pi tan na mumara  
Lheueh nyan teuka teukeudirullah  
Neupeutron susah keu Po Meukuta

Teuka Si Ujut bak Raja Raden  
Ureueng get baten teugoh seutia  
U deh tawoe dalem u nanggroe  
Ka troh kamoe meujak tueng gata

Di kee han kuwoe adoe u nanggroe  
U nanggroe nyoe leupah seutia  
Dalem bek tadong di nanggroe Aceh  
Udeh taweh u Meulaka

Raja Aceh that meuseukin  
Raja gasien papa indra  
Umu lhee thon tadong di sinoe  
Tan lhee katoe meuh taeu rupa

Sangkira tadong dalem di nanggroe  
Si uroe-uroe na limong bahra  
Di kee di nanggroe that kaya  
Manyoh mudai eruepah han kutuho ba

Meung pihak meuh lhee boh geudong  
Di yub anjong muploh ganja  
Meung ija dum muploh geudong  
Meung meuh kupeukrong han teukira

Keunaleueng tamehku meuh seuneupoh  
Taloe reunyeuen kuboh pirak suasa  
Meung geugaseng meusuloe bayong  
Saleuek patong labo suasa

Di kee di nanggroe that meu untong  
Darah mupayong dum peurmata  
Meung lam jurong baleku tujoh  
Teumpat peunioh jampang kuteuka

Muploh seedaga kuboh di peukan  
Kaya-kaya an bak raja gata  
Limong boh kapai mubajee beusoe  
Barang nanggroe ek kurada

Dua boh kapai mubajee pirak  
Ho nyang kujak tihang suasa  
Bintehbukot that meulo-lo  
Meuh sinadoe dum peurmata

Taloe teumirang pirak seuntagi  
Ladom kuseundi ngon suasa  
Kapaiku dalem that meudeune  
Tujoh boh bale lam gumtia

Kemeukawen limong boh nanggroe  
Limong droe putroe jroh-jroh rupa  
Limong boh nanggroe sidroe kugeunggam  
Lhee are jra itam rukon peutua

Sireutoh sikureueng ploh raja di baroh  
Dalem nyang kuboh barang jan masa  
Pakri han dalem tawoe u nanggroe  
Ngon raja nyoe leupah seutia

Nibak kukaphe ka ku Iseulam  
Han kumeudam di kee ngon raja  
Di gata galak dalem ta Iseulam  
Meung saboh lham han le areuga

Nyang get jak tawoe dalem u nanggroe  
That payah adoeteu jiuseuha  
Adoe han kuwoe u nanggroe jeuoh  
Nanggroe mumusoh rok-rok masa

Meung bayam kupula han kuteumee pajoh  
Nanggroe mumusoh seunantiasa  
Gata tamuprang adoe geunab uroe  
Pi ek adoe keureuna buet gata

Taduek dalem ulon muprang  
Bak meugeudubang han kuyue gata  
Oh teuka musoh jak prang nanggroe  
Kumat-mat keudroe kulawan rada

Di gata taduek dalam meuligoe  
Di kee adoeteu dong lam kuta  
Ohnan lawet kupangkai prang  
Padum boh geudubang tulong bak gata

Nyang get tawoe dalem u nanggroe  
Hanle ngon adoe tameudakwa  
Bek tadong le nanggroe nyoe  
Kuprang dudoe binasa gata

Meung kuteumee raja kupeh-peh  
Rakyatji jadeh kupubloe ba  
Ladom kuprang ret Pasi Puteh  
Ladom nideh kuprang Daya

Ladom kuprang ret u Pase  
Ladom u Singke ladom u Nata  
Ladom kuprang ret Meulaboh  
Ladom kuruntonh ret Teuripa

Ladom kuprang ret u Gampong  
Ladom kuprang ret Polo Ruja  
Ladom kuprang ret Aseuhan  
Ladom u Midan ret Samtalira

Habeh kuprang ban peuet sagoe  
Ho jiboh droe raja gata  
Habeh kutawan aneuk Iseulam  
Siat masa nyan kutueng areuga

Nyang han jitem bloe ngon meuh pirak  
Peue nyang galak keu u muda  
Mangat reujang nyan jitem bloe  
Keu boh panjoe kupeutaba

Pakon adoe that teukabo  
Han ek keu hanco nanggroe Meulaka  
Hana hanco nanggroe kee  
Han sicupak abee di raja gata

Pakon adoe kamarit meunan  
Kakira han ek binasa  
Peue bu salah raja Aceh  
Peue bu leubeh raja Meulaka

Meung baro troh gata keunoe  
Tango ku adoe kucalitra  
Pihak areh adoe Putroe Phang  
Putroe jeunulang ahloji bicara

Jiyue tren rakyat jareueng-jareueng  
Gata jiampeueng ngon balatantra  
Beureukah teubee meureuribee  
Meung boh kayee han teukira

Adoe teungku meuukeukawan  
Meung hidangan meuleulaksa  
Oh sajan troh adoe u laot  
Mupaseueng surot geungadab gata

Meung sajan lheueh adoe geungadab  
Teuma geupeurab dumgeu rata  
Lheueh nyan geujok ngon minuman  
Ngon makanan nyang catirasa

Oh ka lheueh adoe tapumajoh  
Gata pi geuboh dalam tahta  
Geupeuteungoh gata u darat  
Geupeujok teumpat bak taraja

Geubri ladom nyan ngon Peukan  
Geuyue keurajeuen ngon Krueng Raja  
Asoe Peukan dum habeh katawan  
Rukon makanan habeh kahila

Katarek adoe nyan ngon pisang  
Karinthak meuriwang reubah po areuta  
Padum-padum katarek teubee  
Kahila di ulee gob meugisa

Beungoh seupot kasukat keueh  
Sang ureueng wakeueh nibak raja  
Padum adoe katamong gampong  
Adat po neutueng han soe sangga

Takoh kayee peue nyang galak  
Nyang meusigak nyan di mata  
Hana beungeh ureueng gampong  
Keureuna lurong nibak raja

Adak bak kayee nyang ka lheueh kateubang  
Neubayeue utang le Po meukuta  
Sibak kayee neubayeue siploh  
Bek jidong kroh jeueb-jeueb peutua

Han jipake han jigeurantang  
Pihak lurong nibak raja  
Sajan geuba adoe u meuligoe  
Peukayan di asoe geusalen gata

Geubri silueue nyang meujunggi  
Bajee di asoe lhee blah dokma  
Geubri ija nyang meusanjak  
Neudong pirak teuneun suasa

Geubri bajee nyang daidari  
Tangkulok geubri siglong nyang raya  
Geubri bungkoh tapak cato  
Deungan boh ru meuh ban peuet panca

Geubri kupiah meuh sinaroe  
Peuleumah budoe peuneuget rata  
Dilee kangui kulet babi  
Jinoe raja bri yum sibahra

Si Ujut deungo meunan areutoe  
Su aneuk bisoe beungeh raya  
Si Ujut beungeh ngon amarah  
Mataji mirah ban aneuk saga

Di gata galak di nanggroe nyoe  
Habeh ngon binoe ka geuteuka  
Geutueng di gobnyan Putroe Phang  
Keu gata geupulang nyang ri meurua

Geutueng gobnyan nyang sambinoe  
Teuma geugantoe nyang sang waba  
Lahna geutem bri Putroe Aceh  
Teuriseh-riseh gata ngon raja

Pakon adoe kamarit meunan  
Kakira han ek binasa  
Bek le kamarit hai tuha asee  
Kah han malee kah cilaka

Pakon adoeku kacarot  
Han katakot keu neuraka  
Jinoe kukheun bek kamarit le  
Kupoh mate si cilaka

Saket keu ate Raja Raden  
Meunoe jikheun keu syeedara  
Kapreh keu kah aneuk bisu  
Singoh uroe kuyue sula

Raja Raden neubungka neuwoe  
Aneuk bisoe meukeukira  
Si Ujut jikheun meunoe ajaran  
Ubak rakan dum barang na

Hanle lale geutanyoe rakan  
Taseumimpan udehta bungka  
Talhom ngon biduek rakan u laot  
Udehta surot dumteu rata

Si Ujut jiteubiet keu u laot  
Jijak meureubot han ban publa  
Asoe Peukan dum habeh jireubot  
Ladong ka jitot ngon Krueng Raya

Padum na poteu jipumalee  
Rumoh siribee kawai raja  
Lapan boh pukat di laot jitawan  
Limong ploh rakan sajan jiba

Dua droe pawang jipoh mate  
Jigantong bangke di mieng kuala  
Ladom jiboh kawe di rueng  
Ladom di reukueng cawiek jungka

Buet Si Ujut hana cakab  
Jiboh lam glab jipeuseksa  
Oh ban jideungo areutoe meunan  
Keudeungaran bak keujruen kuala

Keujruen jitamong ke u dalam  
Ngadab junjongan bak po meukuta  
Ampom tuanku cahi alam  
Seumah laman duli snoepada

Allah-Allah po keujreun droe  
Toh saleh proe peue bu haba  
Tuanku Si Ujut ka u laot  
Jimeureubot han ban publa

Asoe peukan habeh jireubot  
Ladong jitot ngon Krueng Raya  
Padum tuanku jipumalee  
Rumoh siribee kawai raja

Lapan boh pukat ka jitawan  
Limong ploh rakan sajan jiba  
Dua droe pawang jipoh mate  
Jigantong bangke di mieng kuala

Ladom jiboh kawe di rueng  
Ladom di reukueng cawiek jungka  
Buet Si Ujut hana cakab  
Jiboh lam glab jipeuseksa

Poteu deungo meunan areutoe  
Laloe neumoe tron ie mata  
Allah-Allah po keujruen droe  
Toh saleh proe ngon bicara

Jakleh tatron keujruen  
U Pasi jak taili u kuala  
Tapeusapat sigala rakyat  
Tapeurok pakat bak jeub peutua

Tabri haba keudeh u Ladong  
Kuta jipeukong beu tok Krueng Raya  
Poteu neujak bak Raja Raden  
Ureueng get baten teugoh seutia

Ban sajan troh u leuen meuligoe  
Neudong sidroe ateueh kuta  
Na sijamong poteu sinan teuka  
Kunangan jak peunyata

Kunangan jiek' u meuligoe  
Jijak peugoe putroe muda  
Ampo tuanku pocut putroe  
Kamoe peugoe duli sroepada

Laloe teukeujot nibak pangsan  
Neutanyong yohnyan sigra-sigra  
Pakon tapeugoe ulonteu sidroe  
Toh saleh proe siri sabda

Pocut neutron u seuramoe  
Jeh pat aduen droeneu preh gata  
Hantom puroe neubeurangkat  
Siri pakat ngon sroepada

Oh neudeungo haba mumeunan  
That geumaran putroe muda  
Tuan putroe tron u seuramoe  
Neumat di jaroe puan suasa

Na teu keunoe tuanku ampon  
Jak saweue lon pacai nyang hina  
Na bu kamoe hai adoe droe  
Na bu kamoe wahe neusa

Laloe neucom nyan di teuot  
Poteu surot neubri meulia  
Jakleh taek adoe u meuligoe  
Jak tapeugoe raja Meulaka

Kukeumeung tanyong bak Raja Raden  
Na sibaten jih ngon syeedara  
Tuan putroe ek u meuligoe  
Laloe neupeugoe raja Meulaka

Sajan neutamong dalam keuleumbu  
Neupeugoe laju le putroe muda  
Sajan neuduek teuntang teuot  
Ceupet urot neupumeusra

Laloe teukeujot raja nibak pangsan  
neubeudoh yohnyan raja Meulaka  
Pakon tapeugoe tuanku putroe  
Toh saleh proe peuet bu haba

Tuanku neutron nyan u seuramoe  
Jeh sibang droeneu ka teuka  
Hantom puroe neubeurangkat keunoe  
Bak uroe nyoe peue saleh haba

Ban neudeungo haba mumeunan  
Neutron yohnyan bak po meukuta  
Na teu keunoe tuanku ampon  
Jak saweue lon pacai nyang hina

Na meu keunoe wahe adoe  
Na bu kamoe wahe neusa  
Com di teuot seumah meulakoe  
Neumoe meuo-o sang ureueng rugha

Pakon tuanku neumoe meuo-o  
Kukalon lakoe meuse ureueng duka  
Nyang troh kamoe adoe keunoe  
Tadeungo keu nyoe kucalitra

Raja Si Ujut ka u laot  
Jimeureubot han ban publa  
Asoe peukan habeh jireubot  
Ladong ka jotted ngon Krueng Raya

Padum tuanku jipumalee  
Rumoh siribee kawai kuta  
Lapan boh pukat nyang ka jitawan  
Limong ploh rakan sajan jiba

Dua droe pawang jipoh mate  
Jigantong bangke di mieng kuala  
Ladom jiboh kawe di rueng  
Ladom di reukueng jicawiek jungka

But Si Ujut hana cakab  
Jiboh lam glab jipeuseksa  
Adoe kutanyong tanda kuchen  
Na sibaten jih ngon gata

Meunalee nyoe kukheundak tuntut  
Buet Si Ujut na taseureuta  
Sangkira meunan wahe adoe  
Han le di kamoe jih ka raja

Kukeurajeuen ni phon seudang  
Hantom na prang dilee nyang ka  
Siuroe nyoe nanggroeku jiprang  
Putroe Banang kuniet ka jiba

Ampon tuanku siribee ampon  
Hana ulon kuseureuta  
Tuanku Si Ujut tapoh mate  
Di kamoe han le mumeusyedara

Di donya kon troh u akhirat  
Kaphe laknat bek kungieng mata  
Pakri ban kuprang adoe jinoe  
Han kutupat nanggroe han kuturi donya

Adak tapateh haba kamoe  
Mupeurunoe po meukuta  
Tuanku neukrah alem ngon paki  
Sigala wadi ngoñ ulama

Tuanku neukrah ban dua blah karong  
Beu habeh jitron ban sineuna  
Tayue jimodek dum meuribee  
Jijak koh kayee suson behtra

Jikoh seurampee bak seurikoi  
Papeuen peungapet meudang ara  
Tayue jikoh papeuen suson  
Adak tan laen meudang jeumpa

Tuanku neukrah lom ngon tukang  
Nyang jeuet keumarang jisuson behtra  
Tukang tuanku nyang meugah-gah  
Lagi peurintah guna biasa

Sikureueng reutoh limong ploh tukang  
Uroe malam tayue meujaga  
Tukang nyang meugah bak meurapat  
Kayee lukat bek meuri jangka

Ladom utoh bak meuuke bungong  
Pi hale hale dum jipeuna  
Ladom utoh bak keumalok  
Jineh pucok dum lam rika

Jinoe tuanku tapeuhase beusoe  
Tayue jak bloe meung limong behtra  
Bek lale tuanku neuyue beureujang  
Neuyue peh labang meung muploh bangsa

Labang payong labang peungikat  
Nyang leubeh that labang peungila  
Tapeuget kapai meung tujoh reutoh  
Jeumeurang aroh taprang Meulaka

Meung tuanku taprang Banang  
Kupanglima prang bak sroepada  
Beukeuhan tateumee jih di Banang  
Dudoe taprang u Jho Lama

Beukeuhan tateumee di nanggroe Jho  
Bahle taseutet u nanggroe Guha  
Beukeuhan meuteumee ampon duli  
U Jho Bali taseutet lanja

Beukeuhan tateumee ban peuet nanggroe  
Sira tawoe taprang Meulaka  
Habeh narit Raja Raden  
Ureueng get baten teugoh seutia

Jimudek bujang dua blah karong  
Jipeh mong-mong jiseuranta  
Jitron keu rakyat tunong  
Meuhimpon dum meuleulaksa

Hana saboh tinggai le di gampong  
Nyang jeuet sandang bliong habeh geuba  
Ladom tujoh uroe baro meukawen  
Meung ija salen pi goh lom na

Ladom lhee malam gaca di jaroe  
Han le di nanggroe ka habeh geuba  
Ladom jimampleue meung treuk malam  
Basi andam linto ka geuba

Ladom baro troh oh seuramoe  
Geupeutron jinoe lanja geuba  
Ladom baro troh meung oh rambat  
Geupeutron leugat mampleukek geuba

Bu ngon gule habeh basi  
Ulama paki sajan geuba  
Ureueng binoe jimampleukek keudroe  
Ureueng lakoe ka habeh geuba

Jijak keu rakyat dum meure-re  
Seun siribee seun silaksa  
Jeueb-jeueb gunong jeueb-jeueb paloh  
Jeueb-jeueb grugoh jeueb-jeueb data

Gajak ngon badeukek habeh jiboh droe  
Aneuk nanggroe peunoh lam rimba  
Tujoh uroe rakyat lam uteuen  
Geupeutron papeuen han teukira

Kayee di gle mantong ijo on  
Kapai geususon tujoh ploh dua  
Tujoh buleuen rakyat di gle  
Tujoh reutoh le hase behtra

Tujoh blah buleuen neuyue meukayee  
Kapai sirihee hase ka leungka  
Taeu lam nanggroe han le keusukaan  
Di dalam uteuen banda raya

Meuseujid Raya timoh brunyeueng  
Meujampu trueng ngon bayam tuha  
Soh keu mideuen jeuet keu uteuen  
Timoh beuraleuen bube-be pha

Bujang jimudek ka u tunong  
Jipeh mong-mong jiseuranta  
Habeh ka jiwoe dumna rakyat  
Woe u teumpat dumji rata

Oh sare jiwoe nyan u nanggroe  
Han jitusoe ule neusa  
Pane ma ureueng teuka keunoe  
Ubak kamoe sang rupa kra

Pakon bu aneuk nyan kamungki  
Bak Allah bak nabi kameudeesya  
Han katupeue ureueng baro di gle  
Peunyangket sabé hana reuda

Ladom teuka peunyaket deumam  
Ladom pitam hana reuda  
Ladom bahya meurumpok di gle  
Le that mate nyang peutua

Le that mate aneuk rakyat  
Mate le that han teukira  
Masa nyan poteu buka geudong  
Meuh geubuleung ban sineuna

Sidroe-droe mate neubri meuh  
Siploh areuta neuyue boh gasien ngon kaya  
Lom ngon kaphan sidroe sikayee  
Jeuneh hame nyan ngon gasa

Neubri tutue lhee kayee  
Meunan meuteuntee bandum rata  
Tujoh buleuen jiwoe di gle  
Lheueh bak mate lheueh bak mara

Nyang na tinggai dum di nanggroe  
Ureueng binoe meuseumpeuna  
Ya ilahi wa ya rabbi  
Bak Allah bri kaboi pinta

Bah bek jadeh neuprang Banang  
Bak keu seunang hate raja  
Lheueng goh poteu neuprang Banang  
Le keukurangan rugoe raja

Sangkira jadeh poteu muprang  
Leubeh nibak nyan rugoe raja  
Laman mate dalam nanggroe  
Tamumat keudroe tapeulara

Laman mate bak poteu muprang  
Geutiek yub sampan pawoh seuba  
Umu sithon lheueng nibak nyan  
Teuka keu rindang saboh di Guha

Teuka rindang nibak Si Ujut  
Kapai jipeugot jikeumeung peuleungka  
Baro jipeugot meung seurampee  
Rindang di kacee u nanggroe raja

Rindang teusreung di ateueh pusong  
Di pante krueng di mieng kuala  
Rindang teuduek keu di pante  
Ban aneuk gle meunan neuraya

Bukon bubarang mupane-pane  
Nyum-nyum han me taeu rupa  
Teungku ampon hayut takalon  
Meung eumpueng tirom han ban publa

Bukon bubarang tapandang rareb  
Deungon triteb han teukira  
Teungku ampon larab meujuepheuk  
Timoh siseuk sideupa-deupa

Bak jikalon uleh tukang seurampee  
Panyang peuet ploh deupa  
Dumna rakyat han jijeuet teuntang  
That kreueh ganong kayee teuka

Oh jikalon uleh rakyat  
Habeh teumakot ban sineuna  
Keujruen jitamong keu u dalam  
Ngadab junjongan po meukuta

Deelat tuanku Syahi Alam  
Seumah laman duli snoepada  
Peue bu haba keujrurn teuka  
Keunoe takheun bak kamoe sigra-sigra

Tuanku han meutune saboh rindang  
Di pante krueng di mieng kuala  
Rindang tuanku teudu di pante  
Bube aneuk gle meunan neuraya

Dumna rakyat han jijeuet teuntang  
That meuganong rindang teuka  
Adak meunan po keujruen droe  
Bah kutron keudroe u kuala

Jinoe jitron dum uleebalang  
Meujak eu rindang pane teuka  
Bak masa nyan poteu beurangkat  
Tron ngon rakyat u kuala

Poteu neutron hana meusaket  
Payong beurapet dua geuba  
Sigo tum beude sigo gum geundrang  
Gajah jilinggang granggrieng geunta

Beudoh kunangan tujoh blah droe  
Sam-sambinoe ngireng raja  
Laloe jibungka le ngon bujang ara  
Ngon geundrang u kuala

Poteu neutron that mubineh  
Ngon geundrang meuh geundrang suasa  
Ngon geundrang meuh geundrang pirak  
Neukeumeung arak rindang teuka

Neugiduek gajah mabalohan  
Jialeh ban manusia  
Geunta di rukeueng ban kanot dang-dang  
Gajah Jilinggang ban meunta raya

Sajan geuyub ngon napiri  
Gajah jititi langkah tiga  
Poteu pi troh nyan u pusong  
U pante krueng di mieng kuala

Oh sajan troh poteu bak rindang  
Jisapa yohnyan sigra-sigra  
Poteu tanyong pane rindang nyoe  
Saleh toh nanggroe rindang teuka

Teuma jiseuot uleh rindang  
Nanggroemeu tuan di Jho Lama  
Adak takheun jeuoh nanggroe  
Peue buet keunoe tapeuteuka

Kamoe tuanku nyang troh keunoe  
Tango jinoe meucalitra  
Masa Si Ujut kamoe jiteubang  
Jikeumeung prang nanggroe gata

Sangkira lheueh jipeuget  
Kamoe talo nanggroe nyoe sikleb mata  
Kamoe tuanku jen Iseulam  
Han meudam-dam ngon po meukuta

Adak neutem neupeusayang  
Na jidong rindang di nanggroe gata  
Adak neutem peuget kamoe  
Talo nanggroe ho tarada

Tadong keu sinoe raja rindang  
Kuyue tukang jipeuget gata  
Hoka gata dumna tukang  
Tapeuget rindang jinoe sigra

Tukang tapeuget rindangku nyoe  
Dua ploh uroe tapeuleungka  
Dua ploh uroe jipeuget le tukang  
Hase ngon tihang cukob gumtia

Geuboh tihang meuseusanjak  
Ladom pirak ladom suasa  
Taloe teumirang pirak seuntagi  
Meuhambi meuh mupeurmata

Binteh bukot that meulo-lo  
Meuh sinadoe mupeurmata  
Gumtia di iku that bit indah  
Ceureumen geukeubah di pinto gumtia

Habeh keu hase dum sikeulian  
Ngon ampelan kuta mara  
Salah sapat rindangku nyoe  
Di ate kamoe bak ri rupa

Pat bu salah tuanku ampon  
Mumeuhon ampon barang deesya  
Bukot bek tapeuget beusalahan  
Layak rindang taboh geunta

Adak meunan tuanku droe  
Neuyue pande beusoe peuget geunta  
Poteu yue peuget meuteuntee  
Geuntaji lhee raya-raya

Di ulee saboh di iku saboh  
Di tungoh saboh bak tihang raya  
Nyang di ulee Akidatoi Umu  
Geuboh di iku Tulak Mara

Geuboh di teungoh Kasira Khoiran  
Ka geusimpan ban lhee geunta  
Poteu meusabda bak uleebalang  
Peue kuboh nan hai syeedara

Deelat tuanku Syahi Alam  
Tuanku nyang pham bak boh nama  
Adak tapateh narit kamoe  
Nan rindang nyoe Cakra Donya

Oh sare lheueh geuboh nan rindang  
Dum uleebalang sukacita  
Uleebalang dumji galah  
Geunta jihayak Cakra Donya

Siseuen geunta jihayak droe  
Troph lhee uroe tango suasa  
Hoka gata uleebalang  
Di dalam blang ureueng kaya

Bek tameulale bek tameungieng-ngieng  
Tapumeudieng rata-rata  
Poteu neuwoe ma u dalam  
Syahi alam deelat hana

Habeh ka lhom kapai nyang laen  
Meung goh lom jitren Cakra Donya  
Ni phon beungoh kon tok cot uroe  
Tan meugrak droe Cakra Donya

Bujang jitamong leugat u dalam  
Jipeuseumah yohnyan ubak raja  
Deelat togayue Syahi Alam  
Nyang mee geunggam sigala donya

Tuanku ampon meuribee ampon  
Han jitem tron Cakra Donya  
Rakyat jitarek bicah ngon jaroe  
Tan jigrak droe Cakra Donya

Insya Allah bah kutron keudroe  
Ku ili jinoe u kuala  
Poteu neutron ka u pasi  
Ka neuili u kuala

Hoka gata ulama ngon siah  
Tapatiyah talakee doa  
Tabeuet doa teungku pakeh  
Ureueng leubeh ulama raya

Ladom beuet doa ladom leueng amin  
Kaboi mu'min lakee doa  
Poteu gusuek di ulee di iku  
Jitron meuu-u Cakra Donya

Meutum beude jimeusu keudroe  
Nyum-nyum tuloe alam donya  
Lanja jiteubiet nyan u laot  
Laen jiikot Cakra Donya

Poteu neuwoe lanja u dalam  
Syahi alam deelat hana  
Poteu neukeu u meuligoe  
Neumeuhei putroe lam astana

Hoka gata po sambinoe  
Tatron keunoe sigra-sigra  
Pakon tuanku neumeuhei kamoe  
Toh saleh proe siri sabda

Hantom tuanku neumeuhei kamoe  
U meuligoe lam astana  
Peue teukeudi bak uroe nyoe  
Neuheu u seuramoe putroe hina

Nyang kumeuheu tuan putroe  
Meukheundak lakee droemeu bak gata  
Adak na untong nibak Allah  
Meukeumeung meulangkah u Jho Lama

Adak Allah bri umuku lanjot  
Kuseutet Si Ujut meunalee jiba  
Baro uroe nyoe oh neubeurangkat  
Neupeurok pakat ngon putroe hina

Yoh dilee kon han neupeugah  
Keureuna tan nang mbah kamoe teuka  
Teugoe tan sampee hana karong  
Han soe tulong putroe hina

Teugoe tan nang mbah ulon di sinoe  
Han soe peurunoe han soe aja  
Ampon tuanku deelat sinoe  
Han soe peurunoe putroe hina

Han soe kheun ban han soe kheun kri  
That meusampe putroe hina  
Poteu deungo meunan areutoe  
Meumeusabda jinoe po meukuta

Meung kon putroe tapeutulak hareuem  
Han kujak nanggroe Meulaka  
Keureuna gata ahloj hekeumat  
Meutamah kuat tameujaga

Keureuna gata areh billah  
Utoh tateuleuah ileumee rasia  
Na ban takheun han muminah  
Putroe meutuah cit troh mata

Kubungka u laot kuwoe u darat  
Han mupakat deungon gata  
Nibak keuji uroe dudoe  
Bahle jinoe tabicara

Adak tuanku tajak pangkai prang  
Tango Putroe Phang peucalitra  
Padum peunyaket taprang Banang  
Nyang jimeunan peunyaket raya

Han meutudum tuan putroe  
Saboh nanggroe hantom mubun  
Beukeuna gasehteu ngon sayang  
Takheun beureujang uleh gata

Ampon tuanku han meujeuet peugah  
Meutakot salah bak po meukuta  
Bek tagundak po sambinoe  
Ubak kamoe tacalitra

Tuanku lhee boh peunyaket  
Bak taprang Banang nyang jimeunan peunyaket raya  
Saboh peunyaket nyan jimeunan  
Ieji tajam han tapeungapa

Ieji tarek nibak aroh  
Beueh putoh hana meusangga  
Meung tajeumeurang ie teungoh nyurong  
Habeh teupangkong lam-lam bangka

Saboh peunyaket tron di nanggroe Aseuhan  
Sinan keu lawan mula-mula  
Adakna tuanteu jeuet keu gah  
Beukeuhan tuah seb dum nyang ka

Adak tateumee tawoe u Aceh  
Adak han jipeh le Raja Muda  
Beukeuhan meusu panglima prang  
Han ek taguncang Raja Muda

Ureueng meuri panglima prang  
Ek taguncang barang ri donya  
Soe mee kuboh keu panglima prang  
Takheun beuseunang peugah beusigra

Ampoñ tuanku meuribee ampon  
Seumah ulon pacai nyang hina  
Kamoe meuudeb ureueng binoe  
Han jeuet sinoe muboh panglima

Han mupeugah tuanku mupeulahe  
Muboh meuse tamita makna  
Dilee taboh panglima Pidie  
Ureueng nyang gie nibak raja

Dilee taboh panglima nyan  
Nyang jimeunan Mahraja Indra  
Oh han jitem Panglima Pidie  
Jijuree peusie laen panglima

Ampoñ tuanku tanda get baten  
Neupeuek laen neuboh panglima  
Adak meunan deelat meukatoe  
Jiboh geunantoe laen panglima

Meung kon jiboh panglima laen  
Lahe ngon baten jih panglima  
Ri nyang jiboh keu geunantoe  
Barangsoe jih panglima

Ureueng nyan nyang panglima prang  
Ek jiguncang barang ri donya  
Saboh treuk peunyaket tuanku di Banang  
Tango Putroe Phang peucalitra

Oh troh tuanku keunan u laot  
Beude bek neutot po meukuta  
Adak tatot tumupiasan  
Patah meukhan jeuet keu dua

Pakon meunan tuan putroe  
Peue pumaloe peugah sigra  
Nanggroe Banang tuanku that meutuah  
Eelia Allah sinan na dua

Saboh meurandeh saboh meuranoe  
Ureueng po nanggroe asai mula  
Adak tuanku neubeurangkat  
Neukeubah pat putroe hina

Meung goh mupat tuanku neukeubah  
Keureuna Allah han kubri bungka  
Ampon tuanku deelat meukatoe  
Kumat di jaroe bek neubungka

Tuanku tabungka ret meudarat  
Tamita rakyat sidroe dua  
Musoh jibungka ret meulaot  
Geutueng dilikot putroe geuba

Adak meunan tuanku meujak  
Sajan bek gaduh nan putroe hina  
Adak meunan tuan putroe  
Tangoku jinoe kucalitra

Gata kupeujok ubak Allah  
Sinan kukeubah bak asai muda  
Gata kupeujok ubak Tuhan  
Awai phon sinan ulut gata

Meunyo tapeujok lon bak Allah  
Han lontheun langkah bahle tabungka  
Leupah tuanku neujak pangkai prang  
Putroe seumbahyang meulakee doa

Jeueb-jeueb watee lon seumbahyang  
Hajat lakee syupeuat keu po meukuta  
Adak tuanku neukeumeung beurangkat  
Putroe peutat u mieng kuala

Bek taeuntat po sambinoe  
Bahle ohnoe seb di gata  
Gata nyang kutroh dalam meuligoe  
Tuan putroe bek gob eu rupa

Tuanku bek neutham bek neularang  
Geukheun Putroe Phang tan seutia  
Dum ureueng binoe habeh u baroh  
Hana teudoh u kuala

Maseng-maseng jak euntat judo  
Rakyat meuro-ro u kuala  
Habeh jitron banda duson  
Jiikat ayon lam-lam bangka

Hana teudoh meurandeh meuranoe  
Si manyak moe di kuala  
Pakri bu neutham pakri neularang  
Geuthee Putroe Phang tan mubasa

Sabab tan nang mbah disinoe  
Han keu na soe nyang bri aja  
Adak na ate tuanku mukmin  
Neubri idin oh pinto raya

Dua ploh tujoh buleuen Zulkaidah  
Poteu meulangkah prang Meulaka  
Neubeurangkat han meusaket  
Payong peungapet geuba dua

Geuseupot gong ngon keudangde  
Poteu neukek atueuh guda  
Geupoh canang nyan ngon geundrang  
Bukon bubarang meuseusuka

Gong jiseupot deungan geudumbak  
Rakyat mubalo poteu bungka  
Masa nyan poteu beurangkat  
Putroe euntat oh pinto raya

Poteu pi troh oh babah pinto  
Teudong tahe sikutika  
Ampon tuanku Syahi Alam  
Deelat neudong siat na peue haba

Jinoe tuanku neujak nangkai prang  
Tinggai Putroe Phang lam astana  
Padum lawet neucre nanggroe  
Tinggai putroe lam astana

Insya Allah beusilamat  
Talakee syupaat bak Allah taala  
Adak na untong syupaat tabri  
Limong seun aji limong seun puasa

Poteu bungka ret meudarat  
Neumita rakyat dum barang na  
Rakyat di laot peulayeue leugat  
Nyang ret darat poteu raja

Nyang di laot geucok saoh  
Di darat pi riuh lanja geubungka  
Siuroe simalam poteu neucre  
U Pidie le neumeuseuninya

Poteu pi troh u nanggroe Pidie  
U Peukan Sigli neumeuseuninya  
Si uroe si malam poteu sinan  
Rakyat pi jitron meuleulaksa

Ek keu seumah panglima Pidie  
Ureueng nyang giek nibak raja  
Ek keu seumah ureueng nanggroe nyan  
Nyang jimeunan Mahraja Indra

Keureuna rakyat ka habeh jitron  
Ho neusuron neuseuraya  
Rakyat jitron meureuribee  
Jime teubee ngon u muda

Padum boh kapai nyang ka hase  
Takheun jinoe le keungo sigra  
Nyang di Pidie tuanku na limong  
Nyang ka hase ngon balantantra

Talhom kapai u laot  
Taseutot di likot Cakra Donya  
Beukeuna gasehteu ngon sayang  
Tapeungon kuprang u Jho Lama

Kapai jiteubiet dum u laot  
Jiseutet dilikot Cakra Donya  
Geucok saoh kapai di laot  
Di darat beurangkat po meukuta

Lhee uroe lhee malam neujak laju  
U Meureudu neumeuseuninya  
Poteu pi troh u Meureudu  
Neupioh le u simpang tiga

Poteu pioh nyan di simpang  
Di yub keutapang neumeuseuninya  
Poteu neudong that mupadan  
Peunanggahan ngon bala tantra

Tujoх uroe poteu sinan  
Ureueng Meureudu tan saboh teuka  
Ureueng Meureudu tan di nanggroe  
Dum jiboh droe dalam rimba

Ureueng Meureudu keulukeusah  
Jijak ceumeucah jeueb-jeueb rimba  
Masa nyan goh lom rame nanggroe  
Hana sidroe lom peutua

Ureueng Meureudu that saket untong  
Sang glang tutong peudeh jirasa  
Meuse glang lam uroe tarek  
Tutong lagoe ek han teupeugana

Ladom leupah u Sarah Mancang  
Ladom u Meugang ka jihala  
Siteungoh leupah u Sarah Gajah  
Jijak ceumeucah sigala rimba

Ladom leupah jijak cok awe  
Jijak keumiweue jitham rusa  
Tujoх uroe poteu di simpang  
Ureueng Meureudu tron dumji rata

Ri nyang jitron di Gle Puntong  
Jipeutron jagong ngon keutila  
Ladom nyang tron di Sarah Mancang  
Jigulam pisang dumji rata

Ladom nyang tron di Sarah Gajah  
Jigulam boh birah bube-be pha  
Siteungoh ri tron bak keumiweue  
Leumo keubeue le that jiba

Ureueng Meureudu kon le tunji  
Parang di wie ceukok mata  
Ureueng Meureudu tron di gunong  
Ija pinggang dumji rata

Ban sajan troh ujung pante  
Jimeuduek le tuha muda  
Ka jipioh na saboh at  
Jimeurok pakat ngon bicara

Hai lem payong aduen teungku  
Toh bu lakoe tatron bak raja  
Saleh geutanyoe geupoh mate  
Han tatkri ngadab raja

Geutanyoe Meureudu tahe gante  
Upama mante tron di rimba  
Tapaban bah dalem payong  
Teumakot untong tron bak raja

Adak sangkira geupoh mate  
Teuma pakri bek tatron bak raja  
Adak meunan lem teungku droe  
Na bak kamoe saboh bicara

Geutanyoe dalem ureueng leumoh  
U deh tanoh keudeh tabungka  
Bah tameulangkah jareueng-jareueng  
Tabungka u keunaleueng bak Ja ulama

Beukeuna gaseh deungon sayang  
Neupeungon u simpang neutron bak raja  
Udehta jak bak Ja Madinah  
Ulon Allah teugoh seutia

Beukeuna neukeumeung peurame  
Meureudu neupeulakoe tron bak raja  
Keureuna geutanyoe baro masok  
Geutanyoe ban troh dalam rimba

Habeh keukira ureueng lam nanggroe  
Sireutoh lhee ploh droe tuha muda  
Ureueng barang jan nyang kiraan  
Nanggroegeu nyan saboh peutua

Oh sajan troh bak Ja Madinah  
Ulon Allah teugoh seutia  
Kujak Pakeh di meunasah  
Teungoh neupeurintah hukom raya

Oh sare troh u meunasah  
Teungku siah neuseumapa  
Wahe cuco-cuco payong  
Ho tame boh gadong ngon keutila

Ha bu kamoe cuco badan  
Pat ucapan siri keureuja  
Bukon mume keu ucapan  
Peurseumahan keu pro meukuta

Adak na gaseh teungku ngon sayang  
Tapeungon u simpang neutron bak raja  
Tujoh uroe ka poteu keunoe  
Baro uroe nyoe kamoe teuka

Saleh po Ja geupoh mate  
Han meutukri ngadab raja  
Adak meunan cuco badan  
Kutron sajan jak udehta

Bek katakot bek kamalee  
Bukon na kee dakwa raja  
Leubeh di droe nyan neukrajeuen  
Di kee keusukaan lueng agama

Leubeh di droe nyan neupham adat  
Hukom Allah that kee kuraja  
Kon meung raja nyoe di kee kungadab  
Biasa kudeelat yoh masa muda

Peue kutakot peue kumalee  
Meung silayeue kee na peuet boh raja  
Adak meunan po Ja badan  
Jak cok peukayan jak udehta

Neucok ija ngon kupiah  
Bajee jubah seureuban raya  
Neucok tungkat ngon seumambu  
Sente abu di dalam mata

Bit Ja pakeh kon that tunyi  
Geudubang di Wie na sihah mata  
Ja Pakeh tron ka u simpang  
Di yub keutapang neungadab raja

Ja Pakeh yoh nyan meumeuhon ampon  
Jaroe neuseuon ateueh jeumala  
Na sijamong neubeuot jaroe  
Poteu iem droe hana haba

Cuco reuoh basah ngon badan  
Maklum pi tan barang sabda  
Bukon bubarang keusang keusot  
Ngon uroe tot peudeh mata

Ni phon beungoh kon troh cot uroe  
Poteu iem droe hana haba  
Saket ate Kuja Pakeh  
Guree nyang leubeh ulama raya

Ja Pakeh beungeh bukon bubarang  
Neugisa geudubang na sihah mata  
Kuja Pakeh that amarah  
Mataneu mirah ban aneuk saga

Wahe cuco-cuco payong  
Kaseumpom boh gadong ngon keutila  
Kasaleng boh labu ngon boh birah  
Ureueng han ek mutah darah bek kapumeulia

Bek katakot bek kamalee  
Kawoe sajan kee jak udehta  
Oh ka kuwet cuco u gampong  
Adak geupuntong han kuseumah raja

Oh ka kuwoe cuco u nanggroe  
Adak geugogajoe han kuseumah raja  
Adak jeuet kudong di naggroe Aceh  
Adak han kuweh u nanggroe raya

Han get kuwoe u nanggroe Madinah  
Bak teumpat nang mbah keukai baka  
Peue get keudong di nanggroe Meureudoe  
Dumnoe lakoe geutanyoe geupeujra

Oh jideungo meunan areutoe  
Bujang dua droe plueng bak raja  
Deelat togayue Syahi alam  
Seumah laman di sroepada

Neupumaklum tuanku Ja Pakeh Madinah  
Ngon amarah beungeh raya  
Meung ka neuwoe nyan u gampong  
Adak neupuntong han neuseumah raja

I aman ka neuwoe nyan u nanggroe  
Beutagogajoe han neuseumah raja  
Neuyue seumpom boh gadong ngon boh birah  
Ureueng han ek mutah darah bek tapumulia

Beukeu teumee neudong di nanggroe Aceh  
Beukeuhan neuweh u nanggroe raya  
Han get neuwoe u nanggroe Madinah  
Bak teumpat nang mbah keukai baka

Peue neudong di nanggroe Meureudu  
Dumnoe laku geutanyoe neupeujra  
Adak meunan takheun hai bujang  
Jak tariwang bak Ja ulama

Jaleh takheun bak Ja Pakeh  
Hana jadeh tameureuka  
Tapileh boh gadong ngon boh birah  
Tapeuindah Ja ulama

Tayue pioh Ja Madinah  
Keureuna Allah han tameureuka  
Ban jideungo sabda meunan  
Bujang jak kheun bak Ja ulama

Oh sajan troh bak Ja Pakeh  
Guree nyang leubeh ulama raya  
Jibeut jaroe bujoe siploh  
Jiyue pioh Ja ulama

Jipileh boh gadong jicok boh birah  
Jipeuindah Ja ulama  
Ja Pakeh pioh di yub keutapang  
Neumeuteuntang ngon po meukuta

Peue bu laku Ja teungku droe  
Jeh oh uroe gata han teuka  
Tujoh uroe kamoe keunoe  
Bak uroe nyoe kungieng mata

Pakri laku gata Meureudu  
Kamoe beulaku han tapeuraja  
Gata Meureudu hana muproe  
That kreueh gigoe ban sibaka

Tujoh uroe kamoe di simpang  
Sidroe pi tan keunoe teuka  
Adak han mee kukrajeuen ta euntat  
Lam uteuen taboh lam rimba

Adak han ek kugeunggam nanggroe  
Taboh geunantoe Ja le gata  
Ja Pakeh ngo sabda mumeunan  
Han muban-ban tro ie mata

Ampon tuanku Syahi Alam  
Nyang me geunggam alam donya  
Bukon tuanku salah kamoe  
Cit salah droe op meukuta

Pakon han taboh uleebalang  
Si carot nang reujang jula  
Nyang han kuboh peutua nanggroe nyoe  
Nanggroe di kamoe Ja ulama

Nanggroeku nyoe kupubibeueh  
Nanggroe wakeueh barang jan masa  
Hana geusyih hana waki  
Hana tandi kuboh peutua

Ni phon jinoe kon troh an page  
Troph an akhe umu donya  
Beutapateh po Ja teungku  
Nanggroe Meureudu di kamoe raja

Jampang -jampang han seb breueh bu  
U Meureudu kuyue jak mita  
Adak na gaseh Ja ngon sayang  
Gata guree prang u Meulaka

Adak Allah bri umuku lanjot  
Kuseutet Si Ujut meunalee jiba  
Keureuna Si Ujut di nanggroe Aceh  
Jeuet jadeph meureubot raya

Pakri taba kamoe Meureudu  
Habeh ka taeu peuet panca indra  
Laman tuanku taba kamoe  
Mate ureueng binoe dum tuha muda

Ampon tuanku po jonjongan duli  
Pane raseuki lam uteuen raya  
Nyampang-nyampang hawaji pisang  
U Sarah Mancang han soe mita

Nyampang-nyampang hawaji boh birah  
U Sarah Gajah han soe jak mita  
Nyampang-nyampang hawaji jagong  
U Gle Puntong han soe jam mita

Nyampang-nyampang jijak u gle  
Han soe keumiweue bak tham rusa  
Adak sangkira jiteungoh keudroe  
Cula caloe mate lam rimba

Meurumpok gajah nyan ngon badeuek  
Habeh meuseupeuk sigala rimba  
Bek tagundah po Ja keu ureueng binoe  
Na bak kamoe akai bicara

Bek tagundah po Ja teungku  
Na ngon jibloe bu barang jan masa  
Limong tahe buet jaroe mangat  
Jibloe malo ngon sutra

Jibloe kasab nyan ngon malo  
Jipeusaho jipeuget ija  
Barang jan jitron ureueng Meureudu  
Peukayanji ho jroh-jroh rupa

Jampang-jampang po Ja kuyue tren

Jibri salen ija sutra

Na meung meuri ureueng bibeueh

Ureueng wakeueh nibak raja

Kubri ija lhee-lhee kayee

Kuyue bulong rata-rata

Meunan bak ureueng binoe

Saleuem kamoe tuha muda

Uroe malam bek tabri jieh

Buet bak peudeh jimeujaga

Meung tan po Ja dudoe kutueng

Kupeuloe kulet rueng geunantoe ija

Ja Pakeh neuwoe reujang-reujang

Lalu neuriwang pantah sigra

Lalu neucok meuh sinaroe

Neukheun areutoe dumji rata

Wahe cuco tangke ate

Bek kaeh le kameujaga

Kamoe cuco geuba sajan

Han soe kheun ban nyan keu gata

Adak kamoe neuba sajan

Tinggai teu tuan dumteu rata

Bak sidroe-sidroe neubri meuh siploh

Nyan peunajoh nibak raja

Masa nyan poteu beurangkat

Meuron keu rakyat dum barang na

Rakyat bungka dum meuriti

U Kacapuri u mieng kuala

Siuroe si malam poteu sinan

Kitron yohnyan ureueng Samalanga

Jime teubee meureuribee

Meung boh kayee han teukira

Ek keu seumah panglima nanggroe  
Nyan nyang jimeunan Maharaja  
Deelat tuanku Syahi Alam  
Nyang me geunggam alam donya

Ureueng Samalanga habeh ka jitron  
Ho neusuron neuseuraya  
Kri cit narit Meukuta Alam  
Raja jimeunan Iskandar Muda

Padum boh kapai di gata sinoe  
Peugah bak kamoe ureueng keukaya  
Kapai Tuanku disinoe neutanyong  
Kapai limong disinoe nyang na

Sabda talhom kapai u laot  
Taseutet dilikot Cakra Donya  
Beukeuna gasehteu ngon sayang  
Tapeungon kuprang u Jho Lama

Meung na Allah bri umuku lanjot  
Kuseutet Si Ujut meunalee jiba  
Nyang di laot jicok saoh  
Di darat beurangkat poteu raja

Siuroe simalam poteu meucré  
U timu le neumeuseuninya  
Poteu pioh di bineh blang  
Neuseumayang sinan le raja

Ban sajan lheueh neuseumayang  
Teuka peunyunang narit reunanca  
Ampon tuanku meuribee ampon  
Seumah ulon laman sroepada

Eungkot krueng Timu leumak han sabé  
Rapeueng bube-be sampan raya  
Adak meung saboh tateumeung pajoh  
Nyeum-nyeum siploh asoe nyang na

Lheueh jipeugah haba meunan  
Jibungka le yohnyan sigra-sigra  
Sabda beutaseuet kuala nyoe  
Mupajoh di kamoe eungkot raya

Uleebalang dum saket ate  
Mata mirah le ban aneuk saga  
Uleebalang dumji keumah  
Jiyue cob amak nyang raya-raya

Jicok bliong nyan ngon galang  
Kayee jiteubang lhee-lhee go wa  
Yoh masa nyan jipeulaku  
Jipeuloe bintang ho keu amak raya

Dum jimita kulet teugoh  
Saboh-saboh asoe sigunca  
Jicob amak na lhee reutoh  
Poteu suroh seuet kuala

Mita keu taloe dum nyang teugoh  
Geupeusaboh dum geukeumba  
Poteu neutron ulee aron  
Rakyat meuhimpon meuleulaksa

Yoh masa nyan neuyue makeuen  
Geupeuget neuheun geulhob kuala  
Geucok bliong nyan ngon galang  
Jinoe geuteubang kayee nyang raya

Poteu neuyue lhob bukon le guntoe  
Geupeurampagoe peuet panca indra  
Yoh masa nyan geupeulaku  
Kayee geupeudu na peuet-peuet deupa

Geuboh jeuneurob jareueng-jareueng  
Geutheun ie paseueng jampang teuka  
Na lhee reutoh meung seuloran  
Neuyue padan po meukuta

Jinoe poteu neuyue padan  
Geupileh rakan nyang rasa  
Rakyat jidong sare kukoh  
Jimat siploh saboh panca

Neuyue dum nyang cangklak-cangklak  
Nyang meugumbak jipoh-poh cakra  
Sajan jidong sare kukoh  
Ayoh-ayoh jimeudoda

Lhee uroe lhee malam geugruncang  
Tho seumatang saboh kuala  
Di kuala kon ka tho troh u pucok  
Teumalee teukhok le sigala donya

Masa nyan buya le that  
Jieue u darat sang meurua  
Padum-padum mate lam abee  
Jimeureuk-reuk sama rata

Sajan geudrob eungkot lam krong  
Meuteutanom oh-oh dada  
Nyang u laot lhee ploh sampan  
Neuyue euntat keu rakan po meukuta

Eungkot geubulueng dum meusaho  
Dua boh sapo nyang raya-ray  
Oh sajan lheueh geupumajoh  
Neubungka le yoh nyan po meukuta

Nyang di laot geucok saoh  
Di darat beurangkat le poteu raja  
Poteu beudoh teuma ninan  
Neupioh keu nyan u Peudada

Poteu pioh keu di sinan  
Rakyat sajan meuleulaksa  
Lheueh jimanoe rakyat meukatoe  
Bungka jinoe po meukuta

Troh keu rakyat dum meukeubu  
U Krueng geukueh po meukuta  
Di Krueng geukueh dum meuron-ron  
U Jamee Mon neumeuseuninya

Bungka ninan dum mmeuron-ron  
U yub jitron neumeuseuninya  
Rakyat pioh dum meuriti  
Di blang Juli meuseusuka

Poteu meusabda bak Ja Pakeh  
Guree nyang leubeh ulama raya  
Hoka gata Ja Madinah  
Ulon Allah teugoh seutia

Soe keurajeuen dilee nanggroe nyoe  
Tapeugah jinoe Ja ulama  
Kueu Po Ja meusigak that  
Nyoe keu teumpat raja-raja

Bukon keurajeuen tuanku sinoe  
Teumpat pioh droe Raja Deureuma  
Yoh neumeukawen ngon Siti Bangsawan  
Anak-anakan Meureuhom Peudada

Sideh gampong di Peusangan  
Neumeukawen keunan bak Meureuhom Peudada  
Nyampang-nyampang tuanku neuwoe  
Sinoe pioh droe Raja Deureuma

Neukeurajeuen tuanku ampon  
Sideh di Tambon teumpat astana  
Masa keurajeuen po Ja raja nyan  
Ija tuan padum areuga

Ija geumeukat tuanku limong hah samah  
Hana leupah geutueng laba  
Adak meunan po Ja teungku droe  
Bah di kamoe muboh ganda

Di kamoe mumeukat tujoh hah samah  
Han kubri leupah jitueng laba  
Nyampang-nyampang jibloe le ureueng gasien  
Bak jeuet jikuwien aneukji dua

Habeh haba poteu sinan  
Neubungka yoh nyan poteu raja  
Poteu beudoh niyub jiton  
Rakyat meuron-ron meuleulaksa

Bungka keu rakyat meuukeukatoe  
U Peusangan nanggroe neuhala  
Poteu pi troh u Peusangan  
Neupioh sinan di Gampong Raya

Si uroe simalam poteu sinan  
Ureueng Peusangan habeh teuka  
Dum ka jitron jareueng-jareueng  
Poteu jiampeueng ngon bala tantra

Nyan ngon teubee meureuribee  
Ngon boh kayee han teukira  
Kri cit narit panglima Peusangan  
Yoh masa nyan jipeuek sabda

Deelat tuanku Syahi Alam  
Nyang mee geunggam alam donya  
Ureueng Peusangan kahabeh jitron  
Ho neusuron neuseuraya

Padum na kapai di gata sinoe  
Tapeugah bak kamoe sigra-sigra  
Kapai tuanku lahka neutanyong  
Kapai limong disinoe nyang na

Sabda talhom kapai u laot  
Taseutet dilikot Cakra Donya  
Adak na gasehteu ngon sayang  
Tapeungon kuprang u Jho Lama

Kri cit narit peutua nanggroe  
Ureueng mat sagoe meuhon bak raja  
Ampon tuanku Syahi Alam  
Seumah laman duli sroepada

Kamoe bek neuba tuanku bak prang timu  
Bek neuba u Jho prang Meulaka  
Kamoe tuanku sinoe neukeubah  
Meudrob-drob gajah keu po meukuta

Poteu deungo haba mumeunan  
Neukheun yohnyan bak peutua  
Adak meunan gata jinoe  
Bak siseun nyoe han kamoe ba

Gata sinoe nyang meukeubah  
Tadrob gajah keu kamoe raja  
Adak tateumee tadrob gajah  
Gadengji siblah keu kamoe raja

Ni phon jinoe kon troh an akhe  
Troph an page umu donya  
Jipeukek lom seumah peutua nanggroe  
Bah di kamoe mumeusutra

Adak meunan di gata jinoe  
Tinggai teu sinoe han kamoe ba  
Gata meukeubah disinoe di teumpat  
Tapeuudeb ulat tasreng sutra

Na tatudum adat tabri aji  
Bak aji sitahe sipha  
Niphon jinoe kon troh an akhe  
Troph an page umu donya

Habeh keu haba peutua nanggroe  
Poteu jinoe neumeusabda  
Hoka gata Ja Madinah  
Ulon Allah teugoh seutia

Peue nanggroe nyoe Ja teungku droe  
Peue nanggroe geurasi nama  
Adak neutanyong tuanku bak kamoe  
Nyang meuranoe Gampong Raya

Nyan peue tuwi nyang meurandeh  
Peue pante jeh geurasi nama  
Nyang meurandeh han meujeuet peugah  
Malee babah kamoe ulama

Adak po Ja malee babah  
Kamoe peugah rasi nama  
Na tatupeu nyang meurandeh  
Pante meuse jeh geurasi nama

Pante Peusangan nanggroe uteuen  
Jimeunan ohnan tuha muda  
Ni phon jinoe kon troh an page  
Meuse jeh pante geurasi nama

Habeh keu haba bak masa nyan  
Beurangkat le yoh nyan po meukuta  
Poteu jeumeurang Krueng Peusangan  
Leupah u Blang Siti Manja

Neubungka ninan u Blang Reuncong  
Rakyat meuhimpon meuleulaksa  
Di Blang Reuncong neujak laju  
Rakyat meuu-u meuribee laksa

Oh sare troh u Lhok Seumawe  
Neupioh le sikutika  
Poteu bungka di Mon Geudong  
Laju u Pusong neumeuseuninya

Na sijamong neupioh disinan  
Yoh masa nyan neumeusabda  
Hoka gata po Ja Madinah  
Ulon Allah teugoh seutia

Peue nanggroe nyoe Ja teungku droe  
Peue nanggroe nyoe geurasi nama  
Ampon tuanku meuribee ampon  
Seumah ulon pacai nyang hina

Adak tapateh haba di kamoe  
Seumawe nanggroe geurasi nama  
Pakon geupeunan nyan Seumawe  
Po Ja pane asai mula

Ja Pakeh seuot pantah-pantah  
Meunoe silsilah asai mula  
Meunoe tuanku nyang na lonthee  
Ureueng dilee peucalitra

Lhok Seumawe geupeunan nanggroe  
Keureuna buet jaroe Brahim Bapa  
Tujoh boh kadot neukuet anoe  
Neupasoe le Brahim Bapa

Tujoh kadot ka neutammon  
Ulah bangon gunong raya  
Asai nyang jeuet neukuet anoe  
Geukheun meunoe po meukuta

Brahim Bapa teuga han soe  
Meugah bunyoe sigala donya  
Neucok anoe tujoh kadot  
Jeuet keu laot lhok lagoina

Meusyeuhu gah sigala nanggroe  
Troph mubunyoe ubak raja  
Oh meugah bak raja kaphe  
Jibungka le keunoe teuka

Jikeumeung jak eu pakri bangon  
Meugah geukheun teuga raya  
Oh troh keunoe raja kaphe  
Jiteungoh le sigra-sigra

Sajan oh troh dum u darat  
Jitanyong pat Brahim Bapa  
Beurahim Bapa di Lhok Seumawe  
Han jituri uleh raja

Neupeuleumah anoe neugeumasa  
Nyoe keu neubuet Brahim Bapa  
Oh jieu anoe tujoh kadot  
Raja teumakot nyo sang geumpa

Antara ureueng po nanggroe  
Meung buet jaroe han teupeungapa  
Raja kaphe kuyut teumakot  
Jiplueng u laot lam behtra

Nyan keu sabab nyang na meune  
Lhok Seumawe geuboh nama  
Lhok Seumawe nama nanggroe  
Keureuna buet jaroe Brahim Bapa

Nyan peu po Ja nyang meurandeh  
Peue nanggroe jeh geurasi nama  
Deelat togayue Syahi Alam  
Nyang mee geunggam alam donya

Nyang meurandeh ampon keutahanan  
Nyang jimeunan Sawang Peukula  
Masa teuka tuan Putroe Leubu  
Sinoe jitabu Peukula Jawa

Ampon tuanku meuribee  
Bijeh kayee jime di Jawa  
Adak neutanyong nama nanggroe nyan  
Nyang jimeunan nanggroe Samtalira

Peue bu sabab jimeunan Pase  
Nama asee Brahim Bapa  
Neupeuudeb saboh asee  
Nyং si Pase geuboh nama

Poteu beudoh di Seumawe  
Beurangkat le po meukuta  
Ka neujeumeurang Krueng Seumawe  
Neuhala le u Meuraksa

Meuron ke rakyat meukeukatoe  
Leupah u Jambu po meukuta  
Poteu bungka hana lale  
U kuala Pase neumeuseuninya

Oh sajan troh u Jeumahan  
Mupioh sinan sikutika  
Di Jeumahan rakyat meuron-ron  
U Blang Nibong ka neuhala

Poteu pi troh u kuala Keureutoe  
Neupioh droe sikutika  
Di Kuala Keureutoe neujeumeurang  
Ka u lapang poteu hala

Neubungka ninan le neutujah  
U Ceureumen Gajah le neuhala  
Poteu bungka di Ceureumen Gajah  
U Piadah le neuhala

Neubungka ninan u Blang Lhok  
Leupah u Lhok neumeuseuninya  
Neubungka ninan ka neutujah  
Ulee Nipah le neuhala

Oh sajan troh u Jambo Aye  
Neumupike sikutika  
Poteu tanyong bak Ja Madinah  
Ulon Allah teugoh seutia

Soe mee taboh keu panglima prang  
Siri uleebalang nyang mubahgia  
Saleh taboh panglima Pidie  
Ureueng nyang giek nibak raja

Bah keu taboh panglima nyan  
Nyang jimeunan Mahraja Indra  
Teuka cit narit Panglima Pidie  
Ureueng nyang giek nibak raja

Ampon tuanku meuribee ampon  
Seumah ulon namiet hina  
Panglima Pidie bek taboh keu panglima prang  
Tan rukon tan wang mit syeedara

Hana wali hana karong  
Han soe tulong jih panglima  
Teukeudi mate bak jimuprang  
Tan syeedara wang jituen bila

Mit ureueng cok keu peuneudeh  
Han soe gaseh tan syeedara  
Panglima pi mate rakyat pi jiwoe  
Habeh geukiweu sigala donya

Ampon tuanku tanda get baten  
Neupeuek laen neuboh panglima  
Soe cit jinoe panglima dore  
Siri sagoe nyang mee panglima

Meuhan tatem peuek laen  
Lahe baten kuboh gata  
Jakalee taboh tuanku Panglima Prang  
Uleebalang nyang mubahgia

Tuanku taboh Malem Dagang  
Bak pangkai prang guna biasa  
Malem Dagang that geutakot  
Miseji leubat mukaji bunta

Lagi badan that samlakoe  
Suara peungeuroe meunimbang rasa  
Le ngon wali sampee karong  
Le soe tulong jih panglima

Le ngon aduen le ngon adoe  
Le soe gantoe jih panglima  
Habeh keukira karong ngon wali  
Na lhee reutohji nyang sasa

Bandumji santeut dumji mate  
Geudubang han jicre sajan panglima  
Meuseuki uroe meuseuki malam  
Watee phon klam watee sinja

Meuka jidong jimeuteuot  
Hantom jisurot sukee panglima  
Nyan keu nyang mee keu panglima prang  
Uleebalang mubahgia

Laloe meututo Ja Madinah  
Ulon Allah teugoh seutia  
Ampo tuanku meuribee ampon  
Seumah ulon pacai nyang hina

Bek taboh tuanku Malem Dagang  
Cucokue seudang teungoh muda  
Laman mate cuco samlakoe  
Han soe gantoe laen panglima

Adak siribee neupeuek laen  
Han kuchen meuse panglima  
Bek taboh Malem Dagang  
Tapeuupah prang nanggroe Meulaka

Han seb siare troh sigantang  
Tapeuupah prang u Jho Lama  
Allah bek tatham po Ja jeunulang  
Malem Dagang bah jih panglima

Meung kon kuboh Malem Dagang  
Han ek soe guncang nanggroe Meulaka  
Han ek taprang nanggroe Banang  
Han soe teuntang u Jho Lama

Han soe prang u Jho Bali  
Han soe titi nanggroe Guha  
Keureuna Si Ujut that kaya damoh  
Mudai urupah han jituho ba

Adak taboh tuanku Malem Dagang  
Padum boh nanggroe neupulang jitueng meusara  
Padum boh tabri nanggroe  
Nyang di jaroe jitueng meusara

Bak uroe nyoe beuhabeh janji  
Nanggroe siri keu panglima  
Adak meunan Ja teungku droe  
Mubri nanggroe keu panglima

Adak u timu oh Pasi Puteh  
U barat keudeh tanggoe oh Jaya  
Adak u laot tanggoe meurandeh gunong  
Beuladeh tanggoe kuala

Keu jih kubri ngon opeuti  
Sithon kubri meuh limong bahra  
Lom kupulang gunong Meulaboh  
Tanggoe u Susoh troh u Tripa

Po Ja kupulang nanggroe Gampong  
Jinoe kupulang Pulo Ruja  
Lom kupulang Candopati  
Jinoe kubri gunong lingga

Po Ja kupeujok nanggroe Aseuhan  
Kubri sajan ngon Samtalira  
Bähle di kamoe bek tinggai nanggroe  
Cuco samlakoe bah jih panglima

Bak uroe nyoe po Ja habeh janji  
Nanggroe mubri keu panglima  
Jinoe meututo Malem Dagang  
Panglima prang guna biasa

Hoka gata wali ngon karong  
Tapeurab bak ulon wahe neusa  
Tapeurab keunoe karong ngon wali  
Tadeungo janji haba panglima

Beuhabeh dum peutua nanggroe  
Peuet ploh droe meung panglima  
Sare kutanyong soe ek tapanglima prang  
Sambot peunulang nibak raja

Jinoe dalem sambot nanggroe  
Uroe dudoe bek meudakwa  
Tamupake tameuseunoh-seunoh  
Han kujinoh mita dakwa

Jinoe tasambot dumna rakan  
Yoh di hadapan peuneujok raja  
Jimeututo karong ngon wali  
Lhee reutohji nyang sasa

Adoe di lon han kupanglima prang  
Tuah kureueng mit bahgia  
Goh meureutabat nibak Allah  
Hana tuah kupanglima

Adoe payong po samlakoe  
Sambot jinoe teungku bak gata  
Jinoe gata panglima prang  
Uleebalang dum jiyue gata

Nyampang-nyampang bak meusaket  
Kudong kuapet kupeungon gata  
Pihak na gasehteu ngon sayang  
Nanggroe tapulang ke syeedara

Nanggroe tajok kupeulaku  
Kutueng usui kueuntat keu gata  
Kupeujeuet droe upama gileng  
Kutueng geunileng di nanggroe gata

Kru seumangat dalem payong  
Adak bit ulon sirasa gata  
Bit pi kamoe mumat nanggroe  
Sirasa nyeum droe syeedara

Peue bu meujab kamoe pirak  
Asai bak galah gata syeedara  
Jinoe meututo po Ja Pakeh  
Guree nyang leubeh ulama raya

Cuco teungku Malem Dagang  
Tapanglima prang po bak gata  
Bek tatakot bek tamalee  
Na sajan kee lakee doa

Peue ka takot cuco teungku  
Na ku guroe kalon kutika  
Uroe malam cuco tan teudoh  
Kuruan lhee ploh di kee kubaca

Peue katakot uleebalang  
Kapangkai prang jalan agama  
Peue katakot kaprang Yahudi  
Nibak nabi asai mula

Peue katakot kaprang sabi  
Ureueng meuungki keu agama  
Masa neuprang kaphe le nabi  
Tuanteu Ali neuboh panglima

Bak siuroe nyoe raja muprang  
Malem Dagang neuboh panglima  
Cuco kakheun droe ubak nabi  
Beuna ngon suci bak talupa

Beureukat doa tuanteu Ali  
Tuhanku neubri kuat kuasa  
Masa kuteuka di nanggroe Madinah  
Allah peuleumah saboh rahsia

Masa kucre nanggroe Meureudu  
Poteu Allah bantu nabi peulahra  
Beudoh cuco Malem Dagang  
Poteu Allah peutimang nabi peulahra

Geuboh panglima di Jambo Aye  
Rakyat sare meuseusuka  
Sajan geujak Malem Dagang  
Meuseunoh gulam dumgeu rata

Poteu pi neukek ulam gurab  
That meucakab meuseusuka  
Layeue ulee ka jitarek  
Ka geupeukek ngon layeue raya

Ka jitarek ngon taloe klat  
Gurab pi leugat u laot raya  
Ka jiboh layeue teungoh angen  
Pi jroh santeut paksa

Yoh masa nyan poteu meulayue  
Angen pi kheue keunong paksa  
Jitron angen seupoi-seupoi  
Meugeugasoi jiplueng behtra

Ladum keulasi jiteumimbang  
Siteungoh dagang jilakee doa  
Ie ulee sang bungong meulu  
Kapai meutabu di laot raya

Lhee uroe lhee malam peulayaran  
Peujam daratan saphan sapha  
Oh sajan troh sama teungoh laot  
Nanggroe seupot glab gulita

Neungieng u laot nanggroe seupot  
Neungieng u darat saphan-sapha  
Ie laot dak meuse apam  
Nanggroe han mupat donya

Poteu Meukuta Alam meunyuem teumakot  
Raja kuyot manoe ie mata  
Neumeusabda bak po Ja Pakeh  
Guree nyang leubeh ulama raya

Ho geutanyoe Ja teungku droe  
Siri nanggroe saleh angen ba  
Ampo tuanku Syahi Alam  
Nyang mee geunggam alam donya

Bek tagundah bek tatakot  
Pakon kuyot di halirat meulia  
Ulonteu eu dalam surat  
Hana sapat nyang na cidra

Mumeutanggoh umu lhee uroe  
Tatrho geutanyoe ho nyang tahala  
Adak meunan po Ja Pakeh  
Kupaban bah preh tanggoh gata

Adak jampang meukheundak woe  
Han meutupat nanggroe han meuho donya  
Kudong pi mate kuplueng pi mate  
Get keu sare sajan gata

Yoh masa nyan poteu meulayeue  
Angen pi kheue keunong paksa  
Lhee uroe lhee malam peulayaran  
Troh u Aseuhan po meukuta

Masa nyan kapai ka jibaroh  
Geulhom saoh di mieng kuala  
Poteu meusabda bak Ja Pakeh  
Guree nyang leubeh ulama raya

Peue nanggroe nyoe po Ja teungku droe  
Nyoe peue nanggroe geurasi nama  
Tuanku nyoe jimeugla nanggroe Aseuhan  
Raja jimeunan Raja Muda

Raja manggroe nyan kharollah that  
Raja jungkat tan agama  
Kureueng sireutoh ka jiprang nanggroe  
Jireubot putroe jituen areuta

Kureueng sa sireutoh putroe jitawan  
Ngon rampasan habeh jiba  
Raja jipoh putroe jituen  
Areuta jibulueng ban sineuna

Bukon kharollah raja Aseuhan  
Han soe lawan dilee nyang ka  
Adak meunan po Ja teungku droe  
Umanat putroe yoh tabungka

Meung tatot beude di nanggroe Aseuhan  
Geutanyoe jilawan le Raja Muda  
Sinoe keu phon po Ja meuukam  
Geutanyoe jitham han jibri tabungka

Geutanyoe dudoe habehjisagang  
Talawan prang ngon Raja Muda  
Adak na tuanteu jeuet keu gah  
Beukeu han tuah seb dum nyang ka

Adak tateumee tawoe u Aceh  
Adak han teupeh ngon Raja Muda  
Poteu meusabda bak Malem Dagang  
Panglima prang guna biasa

Malem cuba tot beude meung sigo  
Suara beutanggoe sigala donya  
Tot keu beude Malem samlakoe  
Takalon ujoe tacuba juga

Janan jibeudoh Malem Dagang  
Panglima prang that peukasa  
Malem jisok bajee sukaleuet  
Bak siseun jeuet meuhambo cahya

Di ateuh nyan bajee direh  
Teuma silapeh bajee teumaga  
Malem jimat tunam di jaroe  
Di keuieng keurapoe beude jimeujra

Malem jidong di ulee kurong  
Jareueng-jareueng langkah tiga  
Langkah limong jilhom tujoh  
Malem jipeuroh langkah tiga

Langkah tujoh jiboh sikureueng  
Lagee jareueng meuen panglima  
Sajan jitot tunam di jaroe  
Malem jinoe ka jimeujra

Sajan jitot beude meung sigo  
Suara pi tanggoe sigala donya  
Sigo jitot beude di laot  
Tujoh go geusambot dalam kuta

Bak masa nyan keubit jilawan  
Raja Aseuhan kianat raya  
Jitot beude lhee go di laot  
Tujoh blah jisambot nyang raya-raya

Poteu meusabda bak Malem Dagang  
Panglima prang guna biasa  
Bit ban jikheun le putroe Phang  
Putroe Banang sambinoe rupa

Geutot tujoh go beude di laot  
Lhee ploh go jisambot dalam kuta  
Lalu meusabda Raja Aseuhan  
Nyang jimeunan Raja Muda

Hcka gata bujang tujoh  
Katron u baroh u kuala  
Jakleh katron bujang u baroh  
Kakalon musoh pane teuka

Atawa musoh jak puprang  
Atawa dagang jak meuniaga  
Atawa musoh jak prang nanggroe  
Atawa ureueng bloe publoe meuniaga

Sangkira na jiba meuneukat  
Bahle taangkat tameurata  
Barang meuneukat tapeusaho  
Jineh malo nyan ngon sutra

Adak sangkira cawan pingan  
Tabloe keu nyan tameurata  
Adak jiba kapai siribee  
Disinoe mee jimeuniaga

Meuh nyang kutroh tujoh geudong  
Siseun nyoe kucrong kupublanja  
Tujoh geudong meuh beuhabeh kumubloe  
Kupeurame nanggroe kupeujeuet banda

Adak musoh jijak prang nanggroe  
Ulonteu sinoe bah jicuba  
Bek kabri jijak u nanggroe laen  
Sinoe pi kutem prang kurila

Bek kabri jijak u nanggroe timu  
U nanggroe Jho u Meulaka  
Bek kabri jiprang u nanggroe Banang  
Di Aseuhan pi troh masa

Beukeuhan jipateh narit nyang kaeuntat  
Kame ngon surat kapeunyata  
Jakleh katron peuet ploh peuet uleebalang  
Kapeungon bujang jime sabda

Jilhom sampan siseun tujoh  
Jitron u baroh jime sabda  
Sajan leupah geulumbang  
Ngon alangan le jihala

Jiyue peuek alam mirah  
Alamat darah jitham raja  
Malem jikalon alam mirah  
Ateji gundah hana tara

Malem Dagang hana lagee  
Cot ngon bulee mirah ngon mata  
Hoka gata wali ngon karong  
Tapeurab bak ulon wahe neusa

Padum droe geutanyoe nyang tem mate  
Takheun jinoe le dumna gata  
Teungku tacok alam itam  
Taikat tuan bak ulee behtra

Bah tapeuek alam itam  
Tameudam-dam ngon Raja Muda  
Sajan geuboh alam itam  
Tanda meuukam ngon Raja Muda

Kri cit narit jaromudi  
Nyang na turi barang peue basa  
Tadeungo Malem po samlakoe  
Pane nanggroe po get basa

Meueu tajak that meucakab  
Bandum leungkab ngon bala tantra  
Atawa gata ureueng puprang  
Atawa dagang jak meuniaga

Saleuem seumah poku didalam  
Gata neuyue tham han neubri bungka  
Sangkira na taba meuneukat  
Neuyue angkat uleh raja

Adak musoh tajak prang nanggroe  
Tuan disinoe dilee tacuba  
Bek bu tajak nanggroe laen  
Sinoe neutem lawan rada

Beukeuhan tapateh narit kueuntat  
Nyoe leupeue surat taeu nyata  
Toh bu surat taba hai bujang  
Tajok reujang kueu sigra

Sajan jijok surat le bujang  
Sambot reujang uleh panglima  
Malem jiduek teuntang tihang  
Jiploh reujang surat jibuka

Peuteungahan jibeuet surat  
Malem beungeh that hu ngon mata  
Ban jideungo narit nyang saket  
Malem bicah phet jeueb angeeta

Malem Dagang han peue teujalok  
Jigisa pondok hu ngon mata  
Surat pi jicriek jitiek u laot  
Raja meureubot tan agama

Jakleh kawoe kah hai bujang  
Meuaneuk jalang raja gata  
Kapeuek seumah keudeh u dalam  
Bek kabri jitham kee teungoh kubungka

Kamoe kon ureueng alaihi laknat  
Hana kianat teungoh mubungka  
Bukon kukeumeung prang nanggroe nyoe  
Han kutueng putroe peurumoh raja

Adak na untong nibak Allah  
Kukeumeung langkah u Jho Lama  
Peue kutakot raja Aseuhan  
Han mee kulawan Raja Muda

Peue kútakot raja asee  
Peue meung di kee saboh nyawa  
Mate uroe nyoe han jeuet singoh  
Han kujinoh takot keu bahya

Adak mate ulon di laot  
Na pruet eungkot geunantoe keureunda  
Adak mate ku di darat  
Bukon na ulat habeh jiseuba

Masa hai bujang kupandang bumoe  
Kon ureueng binoe geurasi nama  
Masa kutron kuludah reunyeun  
Hana doa seun kupandang donya

Laman ka ek kuprang nanggroe  
Teulah teu dudoe sia-sia  
Nanggroeji talo kutaji kengkeung  
Ngon ureueng gampong sajan kuba

Tatkalo goh bek kabri jitham  
Bukon jih agam dikee dara  
Meunyo sabe ureueng lakoe  
Barang ri nanggroe ek kuraja

Jakleh kawoe kah hai bujang  
Meuaneuk jalang raja gata  
Jakleh kawoe bujang u dalam  
Kupumeuriam jinoe lam kuta

Ban jideungo narit mumeunan  
Jiwoe le yoh nyan keudeh bak raja  
Han mee tadong ngon ureueng Aceh  
Kureueng leubeh jimeudakwa

Sare leupah ni alangan  
U labohan le jihala  
Jinoe jitamong leugat udalam  
Jingadab yoh nyan Raja Muda

Deelat togayue syahi alam  
Seumah laman duli sroepada  
Geuyue kheun tuanku nyan u dalam  
Bek tuanku tham geukeumeung bungka

Bukon ureueng nyan alaihi laknat  
Hana kianat keu sroepada  
Adak na untong nibak Allah  
Geukeumeung langkah u Jho Lama

Teungoh gob jak bek teungku tham  
Bukon agam meung sroepada  
Sangkira ek geuprang nanggroe  
Teulah teu dudoe sia-sia

Nanggroe talo kuta kengkeueng  
Ngon ureueng gampong sajan jiba  
Oh jideungo haba mumeunan  
Yoh masa nyan beungeh raja

Mate aneuk kah hai bujang  
Aneuk jalang paleh pinta  
Adak bujang nyoe jinoe kupeutren  
Kupeuk laen kuboh peutua

Han mee kuboh jih keu bujang  
Aneuk jalang geusuen raya  
Hoka gata bujang peuet ploh peuet  
Nyang sare jeuet mubicara

Ja kamude ulon u tunong  
Kame mong-mong kaseuranta  
Kakheun kuyue tron dum uleebalang  
Dilua di blang ureueng keukaya

Ulon kaseutet tunong baroh  
Ban tujoh ploh kuyue tron raja  
Beukeuna gasehji ngon sayang  
Jibantu prang dum beurata

Kakheun kuprang nyan di laot  
Jikeumeung reubot Keumala Donya  
Jikheundak tueng putroe Aseuhan  
Nyang jimeunan Keumala Donya

Mate aneuk raja Aceh  
Jinoe jadéh kúpublóe ba  
Bah gob meugah Meukuta Alam  
Nyan nyang mee tham le Raja Muda

Jitron keu rakyat meureuribee  
Jitron meuree-ree han teukira  
Mula jikrah Pulo Srune  
Bata Jamani tujoh blah raja

Teuma jikrah Bata Keureulang  
Sare seupot blang meuhajana  
Siuroe-uroe jitron habeh  
Kulet tujoh lapeh putoh rata

Ka jipeuget ngon pupaleh  
Jinoe jadéh prang jibuka  
Ka jipeuek beude u manyang  
Bak bilangan na limong laksa

Jipumeuriam nyan u laot  
Boh beude srot han teukira  
Boh beude u laot sare cham-chum  
Han tatudum ban ujeuen keunong sa

Boh beude di manyang sare soseue  
Meuse glanteue meunan suara  
Boh beude u laot that klam kabot  
Sang kleueng meulot watee sinja

Di laot hu meujeureulah  
Boh beude mirah leumah cuaca  
Meuseuki uroe meuseuki malam  
Hantom padam tan gadoh cahya

Tujoh uroe tujoh malam  
Jipumeuriam hana reuda  
Poteu Meukuta Alam ka teumakot  
Poteu kuyot han teukira

Poteu meusabda bak Malem Dagang

Panglima prang that peukasa

Wahe aneuk bek talawan raja

Aseuhan kianat raya

Adak tapateh haba kamoe surot

Geutanyoe mita bicara

Beukeuna teuka Si Ujut

Page talawan sare di kuala

Sideh aneuk tapeulale

Di Pulo Weh tapeuget kuta

Disinoe bek talawan prang

Dum uleebalang surot udehta

Malem Dagang ngo meunan areutoe

Bujo jaroe ateuch jeumala

Tuanku masa taboh panglima prang

Takheun tajak prang nanggroe Meulaka

Adak uroe nyoe han neubri prang

Pakon uleebalang meung tako ba

Han get meudong tuanku di nanggroe

Peue buetmeu keunoe po meukuta

Masa taboh deelat payong

Tapeucre gampong tatinggai tangga

Peue tatakot raja Aseuhan

Han mee talawan Raja Muda

Adak tuanku that teumakot

Bahle neusurot dilee meukuta

Neujak surot get jinoe kon

Bek neukalon oh jeuet banya

Oh jeuet prang tuanku neusurot

Ulon teumakot keureuna sroepada

Jak neusurot tuanku dilee

Bek meutipee bek meudaya

Jinoe meuhaba Meukuta Alam  
Raja jimeunan Iskandar Muda  
Adak kuthee meunoe tungang  
Malem Dagang han kuboh panglima

Jakalee kuboh panglima Pidie  
Mangat muesie mita bicara  
Nyoe ka kuboh Malem Dagang  
Keureuna biek tungang rukon mubaka

Poteu surot laju u laot  
Sireutoh dilikot kapai neuba  
Oh han le troh boh meuriam  
Peujam daratan neumeuseuninya

Tinggai kapai sikureueng reutoh  
Nyang meukukoh sajan panglima  
Hoka gata wali ngon karong  
Tapeurab bak ulon keunoe syeedara

Padum droe gata nyang tem mate  
Takheun jinoe le dum syeedara  
Baranggasoe nyang teumakot  
Jak tasurot u laot raya

Ka jimarit karong ngon wali  
Lhee reutohji nyang sasa  
Wahe teungku Malem Dagang  
Panglima prang that peukasa

Meujak pi sajan muwoe pi sare  
Udeb mate sajan gata  
Adak meunan dalem payong  
Gaseh tulong keu panglima

Maka cit narit Raja Raden  
Ureueng get baten teugoh seutia  
Di kamoe pi adoe mumeukukoh  
Kapai tujoh ploh kupeungon gata

Udeb ku sare mate ku sajan  
Adoe badan han kucre gata  
Adak mate ku adoe badan  
Bak mee sikaphan geutanyoe dua

Ija sikayee tameukoh-koh  
Papeuen saboh tameudua  
Adak meunan dalem payong  
Gaseh tulong keu panglima

Teuka seuneuot panglima Pidie  
Ureueng nyang giek nibak raja  
Di lon pi adoe kumeukukoh  
Kapai tujoh kupeungon gata

Meung mee kujak kucre nanggroe  
Hareuem adoe han kuboh gata  
Masa muboh gata keu panglima prang  
Dum uleebalang geunab rata

Masa muboh di Jambo Aye  
Oh lham peucre han tinggai seutia  
Adak uroe nyoe adoe kuplueng  
Bak aneuk tunong jheut that guna

Kri cit narit po Ja Pakeh  
Guree nyang leubeh ulama raya  
Cuco teungku Malem Dagang  
Tapubeudoh prang keunong kutika

Tabeudoh cuco uleebalang  
Tabri gurangsang keu rakyat dumna  
Bek katakot bek kamalee  
Na sajan kee lakee doa

Ohnan jibeudoh Malem bangsawan  
Jicok peukayan meungui panglima  
Dilee jisok bajee sukaleuet  
Bak siseun jeuet meuhambo cahya

Di atueh nyan bajee direh  
Teuma silapeh bajee teumaga  
Malem jidong di ulee kurong  
Jareueng-jareueng langkah tiga

Langkah limong jilhom tujoh  
Malem jipeuroh langkah tiga  
Langkah tujoh jiboh sikureueng  
Lagee jareueng meuen panglima

Roh ngon tunam jimat di jaroe  
Malem samlakoe jadeh jimeujra  
Sajan jitot beude di jaroe  
Seun saboh sagoe reuloh kuta

Beudoh di uneuen Raja Raden  
Ureueng get baten teugoh seutia  
Jitot beude that meusanjak  
Kuta pipak seun-seun sideupa

Beudoh di wie panglima Pidie  
Ureueng nyang giek nibak raja  
Lheiji santeut ngon Malem Dagang  
Ban geutueng saboh jangka

Tujoh uroe Malem pangkai prang  
Hantom meuriwang hantom meuriba  
Malem jingieng nyan u likot  
Meunyeun teumakot dum syeedara

Jieu rakan ladom kagli  
Mubot-bot gaki jikeumeung bungka  
Siteungoh ri jikalon pah-poh  
Jikeumeung koh saoh meurigab bungka

Kri cit narit Malem Dagang  
Panglima prang that peukasa  
Hoka gata wali ngon karong  
Tapeurab bak ulon keunoe syeedara

Pakon dalem kukalon pah-poh  
Takeumeung koh saoh meurigab bungka  
Barang soe gata tatinggai kamoe  
Tapeurab keunoe dum syeedara

Tapeurab keunoe peutua nanggroe  
Lonjak mat jaroem dum syeedara  
Adak na silamat dalem bak ulon  
Dalem kuseuon ateueh jeumala

Beukeuna untong page dudoe  
Na kutusoe tinggai seutia  
Na kutuoh mita lawan  
Kuyue mubisan sabe padra

Tapeurab keunoe dalem puteh di  
Kuikat janji dalem ngon gata  
Kumeujanji dalem beuhabeh  
Tameujeb ie kreh alat sinyata

Baranggasoe takheundak plueng  
Bak boh beude tuengteu syeedara  
Baranggasoe janji taruntoh  
Bak kreh pajohteu syeedara

Masa taboh lon keu panglima prang  
Uleebalang santeut rata  
Yoh tapeuek di Jambo Aye  
Meung goh lham cre han tinggai seutia

Bak uroe nyoe aduen taplueng  
Bak boh beude tuengteu syeedara  
Oh jideungo meunan areutoe  
Peutua nanggroe manoe ie mata

Jimeungieng-ngieng keudeh-keunoe  
Jimoemoe-moe sare kabra  
Wahe rakan tangke ate  
Han jeuet taplueng le sigala neusa

Baranggasoe geutanyoe taplueng  
Bak boh beude tueng jilakee doa  
Baranggasoe janji taruntoh  
Bak kreh pajoh jilakee doa

Tadong pi mate taplueng pi mate  
Taek beusare sajan panglima  
Meung na udeb aneuk tunong krong  
Tadong di rueng dum syeedara

Meung ka mate aneuk tunong krong  
Barang jan taplueng han malee mata  
Sajan jiek Malem Dagang  
Panglima prang guna biasa

Sajan jiek dum muree-ree  
Seun siribee seun silaksa  
Sajan jiek dum meuree-ree  
Dua blah sukee rakan panglima

Jipeurab u nab meusurot u likot  
Boh beude ba pot kapai panglima  
Lhee deupa jiek dua deupa meusurot  
Meunyeum teumakot rakan panglima

Malem jingieng wie ngon uneuen  
Rakyat jikheun meung jibasa  
Dalem payong meukuta nanggroe  
Takalon jaroe ateueh jeumala

Tango dalem haba peuingat  
Narit umanat haba rahsia  
Mate di wie mate di uneuen  
Bek takheun-kheun meung tabahsa

Reubah di nab reubah di likot  
Bek taseubot bek tasapa  
Soe nyang mate bahle meugule  
Soe nyang udeb peuek beurata

Beukeuna untong leupah u darat

Dudoe tahimat tameukira

Troh u darat tamupadan

Taeu nyang tan siri nyang na

Disinoe bek tapeugah-peugah

Keureuna Allah taek beurata

Hai lem payong meukuta nanggroe

Taeu jaroe kuseumah neusa

Jiseupot gong jipeh canang

Jipeh ngon geundrang hareudom mama

Gong geuseupot lagee geudumbak

Suara meuhayak jiek panglima

Sajan geuyub ngon napiri

Rakyat beureuhi dum barang na

Suara beude peujam daratan

Ngon suara geundrang meugumpita

Bukon sayang Malem Dagang

Meukumbang prang di lact raya

Tujoh uroe ka geumuprang

Talo raja nyan saboh kuta

Jinoe Malem leupah u darat

Jimeuteumpat di mieng kuala

Jipeudong jambo di teungoh padang

Jipangkai prang jilawan raja

Dalam kuta na mon tujoh

Teumpat mupioh tuan panglima

Wahe lem payong bek peue daleh

Geudubang Aceh peutimang rata

Dumna aduen bek taplueng-plueng

Aneuk tunong krueng taek beurata

Beudoh di uneun Raja Raden

Ureueng get baten teugoh seutia

Beudoh di wie panglima Pidie  
Ureung nyang giek nibak raja  
Nyang di teungoh Malem Dagang  
Panglima prang that peukasa

Lalu jiek meuree-ree  
Seun siribee seun silaksa  
Siseun grub beude sare ranab  
Habeh jipeurab jiek lanja

Ni phon beungoh kon jipubeudoh prang  
Talo keu tuan saboh kuta  
Umu lhee uroe Malem jimuprang  
Talo keu tuan lhee boh kuta

Geunab peuet uroe Malem jimuprang  
Talo keu tuan peuet boh kuta  
Umu nam uroe Malem jimuprang  
Kaphe jicang na silaksa

Nyang na tinggai saboh-saboh  
Habeh jipeukoh bak Raja Muda  
Lheueh nyan tinggai kuta saboh  
Nyang that teugoh lingka astana

Padum pareh padum pacang  
Lingka kuta nyan junga meucula  
Meung bak pacang tujoh lapeh  
Junga meutinده suda meulila

Meung sajan troh rakyat nyang le  
Tahe gante jikalon suda  
Ladom gameuem teudong keudroe  
Teukab jaroe toe rab luka

Lalu meututo po Ja Pakeh  
Guree nyang leubeh ulama raya  
Cuco teungku Malem Dagang  
Panglima prang that peukasa

Peue bu kadong tahe gante  
Meuse mante tron di rimba  
Beudoh keu cuco uleebalang  
Kalingkeue pacang kaeu kuta

Bek katakot bek kamalee  
Na sajan kee lakee doa  
Uroe malam cuco han teudoh  
Kuruan lhee ploh di kee kubaca

Kacuba eu meung saboh nanggroe  
Kacuba ujoe umanat po Ja  
Kalakee tulong ubak Allah  
Beureukat siah ngon ulama

Kaniet kajeumeurang dalem bak rabo  
Meunan hai po patah suda  
Meuse tabloh dalam alue  
Bangon bak meuteutimpa

Jinoe beudoh Malem Dagang  
Panglima prang that peukasa  
Lalu jiek keu meuree-ree  
Dua blah sukee jiek panglima

Malem jingieng wie ngon uneun  
Rakyat jikheun meung jibasa  
Jingieng u nab jingieng u likot  
Jaroe jibeut atueuh jeumala

Rakan boh ate beu tathee  
Allah nyang peurintah alam donya  
Mate uroe nyoe han jeuet singoh  
Bek tajinoh takot keu bahya

Baranggajan rakan tamate  
Sit tatuho cre tinggai donya  
Baranggapat bumoe peuet hah  
Peue bu teulah meung keu bahya

Dilee jigroh Malem Dagang  
Habeh pacang meureuleuek rata  
Sajan jilumpat Raja Raden  
Meureuleuek nyang laen seun sideupa

Lalu jigrob panglima Pidie  
Han jipeusie rukon junga  
Lheueh nibak nyan jigrob rakyat  
Teuma jilumpat seun silaksa

Geunab ka troh tujoh uroe  
Talo keu sampoe tujoh boh kuta  
Ka keu talo kaphe  
Jiplueng u gle jipeukoh lam rimba

Ladom jiplueng dum lam uteuen  
Meusangkot reuen-reuen dum bak dada  
Nyang lob pageue srahet pajoh  
Nyang madon bloh rukam seuba

Tujoh uroe jiplueng geumeuntam  
U gunong itam keudeh jihala  
Jinoe jitamong Malem samlakoe  
Ka troh jinoe saboh kuta

Hoka gata wali ngon karong  
Taeu jaroelon di atueuh jeumala  
Nyan peue beude limong ribee  
Taangkot hai sampee peudieng lam behtra

That geumaseh raja Aseuhan  
Jibri keu rakan mudai biaya  
Han seb mudai taprang timu  
Tulong bantu gaseh raja

Oh jideungo meunan areutoe  
Ban sinaroe meuleulumba  
Tujoh geudong jiangkot leugat  
Tujoh blah sarat jipeudieng lam behtra

Jinoe jitamong Malem samlakoe  
Troh u keude tuan panglima  
Sajan jiek Malem samlakoe  
Jikalon peutoe dum cot raya

Jikalon peutoe dum hana ban  
Ngon peukayan han teukira  
Raja Muda tan jisimpan  
Baranggajan jiharab keu kha

Pasai nanggroe nyan hantom talo  
Jiharab keu bhe silama-lama  
Kri cit narit Malem Dagang  
Panglima prang that peukasa

Peue bu tadong peutua nanggroe  
Tapeutron peutoe dumteu rata  
Tapileh peutoe dumna rakan  
Tacok peukayan tungui beurat

Soe nyang galak silueue meucangge  
Tacok sare hai syeedara  
Maseng-maseng cok peukayan  
Jililet bak badan dumji rata

Jinoe jitamong Malem samlakoe  
U leuen meuligoe troh panglima  
Ban sajan troh u leuen meuligoe  
Jideungo putroe jimoe rugha

Jideungo putroe moe meuro-ro  
Jimubae dumji rata  
Kureueng sa sireutoh putroe disinan  
Nyang kunangan Raja Muda

Geunab sireutoh ngon putroe Asuhan  
Nyang jimeunan Keumala Donya  
Kri cit narit Malem Dagang  
Panglima prang that peukasa

Bek that galak wahe rakan  
Bek kriaan sangat raya  
Tadeungo keu jimoe ureueng binoe  
Bukon le jimoe dukacita

Adak talo nanggroe geutanyoe  
Sibangsa nyoe judoteu rugha  
Di geutanyoe dawok taplueng  
Judoteu geutueng geupubloe ba

Habeh jitron meukeukubok  
Jisanggoi ok tuha muda  
Sinan keu rakan that leumoh ri  
Habeh keuji ban sineuna

Tapateh keu lon wali ngon karong  
Inat keu untong bek that ria  
Tadeungoku dalem lingka peuet sagoe  
Takaon musoh woe pane teuka

Bah kucuba ek u meuligoe  
Kujak eu putroe nyang jroh-jroh rupa  
Kureueng sa sireutoh putroe  
Disinoe that sambinoe judo raja

Bek hai rakan kaceumuru  
Buet han meulakoe han kukeureuja  
Malingkan harab teu keu Allah  
Beuraukat siah ngon ulama

Lalu jiek Malem samlakoe  
Jiek sidroe tuan panglima  
Malem jiek leupah u rambat  
Jideungo maken that putroe rugha

Malem jidong nyan teuntang rang  
Ulee jitumpang manoe ie mata  
Ninan Malem jiteurajee  
U pinto juree leupah panglima

Oh sajan troh u babah pinto  
Teiduek tahe sikutika  
Malem jingieng dalam kawan  
Toh putroe Asehan judo raja

Malem jingieng ngon iku mieng  
Jikeureuleng ngon iku mata  
Di ujung ok kon troh ujung gaki  
Na meung meuri Keumala Donya

Kri cit narit putroe sidroe  
Nyang na raghoe bijaksana  
Wahe rakan tangke ate  
Pane keunoe le ureueng nyan teuka

Kueu jiduek di pinto juree  
Pane jamee keunoe teuka  
Bukon bubarang kutakot that  
Miseji leubat mukaji bunta

Lagi badan that samlakoe  
Ngon peungeuroe hana tara  
Kueu jingieng ngon iku mieng  
Jikeureuleng ngon iku mata

Di ujung ok kon troh ujung gaki  
Rukon peunyeuri panyang mata  
Di ujung ok kon troh ujung gaki  
Biek beudawi ri di mata

Kri cit narit putroe sidroe  
Nyang na raghoe bijaksana  
Hana taturi tan tatusoe  
Pusat nanggroe Keumala Donya

Nyan nyang geukheun Malem Dagang  
Panglima prang that peukasa  
Peue han jitakot judo geutanyoe  
Sibangsa nyoe badan sasa

Oh jideungo Malem samlakoe  
Teusinyom dudoe jipaleng muka  
Teuma jibeudoh Malem samlakoe  
Lalu jipeutoe bak geuguda

Oh sajan troh bak bantai suson  
Jiduek sinan sikutika  
Tan jibri ranub nyan keu adoe  
Tuan putroe manoe ie mata

Malem Dagang that beurani  
Putroe pi kreueh bulee mata  
Ka jitarek puan di jaroe  
Jipajoh keudroe ranub bak poda

Na lhee gapu ranub jipajoh  
Sare tho reuoh tuan panglima  
Malem Dagang mat di jaroe  
Tajak keunoe wahe poda

Ka jipeutron di meuligoe  
Tuan putroe lalu jiba  
Ka jiba tron putroe u pasi  
Jipeuili u kuala

Ka jipeuek dalam sampan  
Lheueh nibak nyan lanja lam behtra  
Ka jipeutamong dalam bukot  
Putroe jipeulob lam gumtia

Po da payong meukuta nanggroe  
Taduek keu sidroe lam gumtia  
Po da bek kuduek sinoe sajan  
Ibleh syaitan bek jidaya

Bek tameungieng po da kayem  
Jakalee takhem-khem han get basa  
Umu lhee uroe di laot  
Putroe meututo jinoe po meukuta

Aneuk teungku Malem Dagang  
Panglima prang that peukasa  
Udehtawoe po Malem geutanyoe  
Putroe sambinoe ka na taba

Udehtawoe po Malem u Aceh  
Bahle jadéh taprang Meulaka  
Kungieng meulaku that mupadan  
Putroe Aseuhan Keumala Donya

Adak na untong tateumee riwang  
Keu ngon putroe Phang ateueh kuta  
Adak teuka Si Ujut u Aceh  
Talawan jadéh di mieng kuala

Sideh po Malem tapeulale  
Di Pulo Weh tapeudong kuta  
Sinoe bek le tapangkai prang  
Uleebalang surot udehta

Yohnyan jimarit Malem Dagang  
Panglima prang that peukasa  
Ampon tuanku Syahi Alam  
Seumah laman duli sroepada

Masa taboh panglima prang  
Neukheun neujak prang u Jho Lama  
Adak uroe nyoe han neubri prang  
Pakon uleebalang meung neuko ba

Masa neuba deelat meukatoe  
Neupeucré nanggroe neutinggai tangga  
Bit na ulonteu ba putroe  
Meuseubot gantoe keu syeedara

Hana ulonteu kheundak pumilek  
Bukon gundek nyo syeedara  
Hana kukeumeung tueng keu judo ulon  
Tuanku ampon keu aneuk jeumpa

Masa kutueng tuanku janji ka leupah  
Kuseubot sah nyo syeedara  
Di donya kon troh an akhirat  
Kon keu sahbat sah syeedara

Ampo tuanku keureuna Allah  
Ulonteu niet sah nyo syeedara  
Yoh nyan meututo poteu Meureuhom  
Nyoe ban neukheun bak panglima

Beukeuhan jeuet aneuk tapeulagee  
Tabri keu kee Keumala Donya  
Ampo tuanku Deelat jeunulang  
Han jeuet keu sibang po meukuta

Bukon laman snoepada meuteureukah  
Jeuet keu tolah po meukuta  
Han ek tuanku ulonteu mubisan  
Han ek lon pulang payong suasa

Adak meunan aneuk puteh di  
Bahle bek tabri Keumala Donya  
Bahle bek tabri aneuk teungku  
Han kumeunabsu po da keu gata

Meuse aneuk kumita sudi  
Kumeucakri keumeuseunda  
Meunan keu nyang get deelat jeunulang  
Gaseh sayang keu namiet hina

Lawet lawan dudoe nibak nyan  
Teuduk haba nyan laen calitra  
Tujo uroe di laot putroe  
Jitron jinoe le Raja Muda

Jitron di gle jipeutron awe  
Jisangka han le rumoh tangga  
Geutanyoe rakan tatron di gle  
Tapeutron awe dumteu rata

Rumoh nyang na han le di gampong

Jitot ka tutong ban sineuna

Rumoh jitot areuta jitueng

Judo jiba plueng jipubloe ba

Adak geutanyoe peutalo nanggroe gob

Meunan keu tatot sigala donya

Adak na rakan niroh untong

Bak rumoh tutong tapumula

Adak na tuah roh ngon untong

Tapula bakong tatueng laba

Ban sajan troh rakyat u nanggroe

Maseng-maseng woe u rumoh tangga

Jieu keu pageue hana lapang

Sibak pisang tan binasa

Jieu hana geutot nanggroe

Jieu putroe hana geuba

Raja Muda troh u leuen meuligoe

Jideungo putroe ceumong rugha

Kureueng sa sireutoh putroe disinan

Yoh masa nyan dukacita

Kri cit narit raja Aseuhan

Jimoe yoh nyan han teukira

Allah judo ureueng binoe

Mantong disinoe ulon nyawa

Kukheun judo hana saboh le

Dumteu sare ka habeh geuba

Raja Muda ek u meuligoe

Jijak eu putroe siri nyang geuba

Sare jieu dalam kawan

Toh keu nyang tan siri nyang na

Allah judo ureueng binoe

Tinggai kamoe gata jiba

Adak kuthee judo jitueng  
Sajan kuba plueng gata kuba  
Sit hana jan judo kuba plueng  
Jitak di rueng hana tara

Sigo kungieng nyan u likot  
Ngon leumbeng srot sihah-hah mata  
Nyang kutakot Malem Dagang  
Bukon bubarang meugah peukasa

Hoka gata ulon krani  
Nyang na kurbri kira laba  
Jakleh cok meuh dalam geudong  
Jahkleh kacrong meuh lhee gunca

Kajak boh meuh dalam sampan  
Kujak teuboh putroe Aseuhan u laot raya  
Raja Muda tron u bale  
Jihei namiet le pantah sigra

Hoka gata ulon da tuah  
Nyang na meugah pantah bicara  
Peue peunajoh nyang na indah  
Peue nyang meugah u laot raya

Adak neukeumeung keu peunajoh  
Rukon ceunicah tuanku taba  
Tapeudieng pisang meung tujoh sampan  
Taba sajan ngon boh keulangsa

Lhee gunca sira peuet gunca capli  
Tujoh boh guci sajan ngon cuka  
Rakyat jimudek jeueb taloe krueng  
Pisang klat jitueng sigala donya

Tujoh uroe rakyat di gle  
Jitron sare rata-rata  
Ka jiili dum u baroh  
Jipeudieng peunajoh u laot raya

Ka jiili dum meuron-ron  
Rakyat jitron u kuala  
Sajan leupah bak alangan  
Yoh masa nyan meuseusuka

Ka keu jiboh alam puteh  
Tanda jigleh keu panglima  
Oh sajan troh bak Malem Dagang  
Panglima prang that peukasa

Na sijamong jibeuot jaroe  
Malem jjiem droe hana haba  
Cuco reuoh basah ngon badan  
Maklum pi tan bak panglima

Inseuh sayang Malem Dagang  
panglima prang that peukasa  
Bek hai dalem tangadab kamoe  
Bukon nyoe meureutabat raja

Adak dalem neukeumeung ngadab  
Keudeh neupeurab bak meukuta  
Keudeh dalem mee tarujoe  
Poteu neuduek lam Cakra Donya

Oh sajan troh bak Meukuta Alam  
Raja jimeunan Iskandar Muda  
Ampon tuanku meuribee ampon  
Maklum ulon namiet nyang hina

Na sijamong jibeuot jaroe  
Poteu iem droe hana haba  
Inseueh sayang poteu budiman  
Yoh masa nyan neukheun bak raja

Bek le raja tangadab kamoe  
Han disinoe Keumala Donya  
Kupaban chen kupaban sayang  
Peue kupulang putroe hana

Keudeh tajak bak Malem Dagang  
Adak jipulang putroe keu gata  
Meung jibri le Malem Dagang  
Hana larang bak kamoe raja

Raja Muda jak bak Malem Dagang  
Panglima prang that peukasa  
Kujak keudeh geuyue jak keunoe  
Cuko kamoe adoe bak gata

Beukeuna gaseh adoe ngon sayang  
Jinoe tapulang Keumala Donya  
Tabri kuteuboh po da teu sidroe  
Nyoe leu peue adoe meuh lhee gunca

Hai lem teungku tangke ate  
Bek tamarit le lem Raja Muda  
Tameututo tan meujeulih  
Narit ibleh han so sangka

Patot tateuboh po da di kamoe  
Bukon daku nyoe biek blaga  
Dadang-dadang meutulak deungki  
Teubiet putroe le dalam gumtia

Lalu jibuka pinto kuaroe  
Jiduek putroe rab panglima  
A doe teungku Malem Dagang  
Panglima prang that peukasa

Taba ulon u nanggroe Aceh  
Jinoe jadeh kuseutet gata  
Tabaku keudeh adoe pangulee  
Kutueng ie montee u nanggroe gata

Kru seumangat po da payong  
Taeu jaroelon atueh jeumala  
Bek Allah bri po da kupeunamiet  
Hana patot dum-dum gata

Nibak geuprang uroe dudoe  
Tabaku adoe sajan gata  
Bek le po da tameututo  
Han mee kudeungo go da raja

Bek le po da tameututo  
Po da teungku bek tameudakwa  
Ka bunoe kon tameucakri  
Bek marit le jinoe di gata

Adak meunan po samlakoe  
Marit keu adoe kuiem di po da  
Hai lem payong meukuta nanggroe  
Tadeungo kamoe lem Raja Muda

Tatem dalem taseumayang  
Na kupulang po da gata  
Tatem dalem buet nasihat  
Tamesyadat gata syeedara

Tatem pubuet keureuna Allah  
Kupeuseumah bak Ja ulama  
Bek le taseumah mata uroe  
Rukon pujoe nabi Musa

Bahle adoe kuseumayang  
Asai tapulang po da le gata  
Oh sajan jimat keu di jaroe  
Jijak samlakoe bak Ja ulama

Hai Ja teungku uleebalang  
Tapeuseumayang lem Raja Muda  
Tapubuet po Ja keureuna Allah  
Tapeuseumah lem Raja Muda

Jinoe po Ja beutageunggam  
Tapeuisseulam Ja le gata  
Mangat ate po Ja Pakeh  
Guree nyang leubeh ulama raya

Neuthee meutuah Malem Dagang

Ek jilarang Raja Muda

Oh mee jiiseulam raja di baroh

Ban tujoh ploh habeh rata

Umu lhee buleuen jih disinan

Habeh peusalinan bak Ja ulama

Habeh geubri buet nyang sihat

Geujok peundapat nyang samporeuna

Kri cit narit Malem Dagang

Panglima prang that peukasa

Cut da payong meukuta nanggroe

Jinoe tajak woe hai syeedara

Peue bu kubri keu gata adoe

Kusalen jinoe keu panglima

Salen kubri euncien kapho

Meung bek anco manyet nyan taba

Adak nyampang rakyat mate bek

Keu cre-bre bek binasa

Oh sare lheueh geusrah darah

Tasak lam babah bek binasa

Darahji tho badan pi gleh

Sang ureueng eh teungeut nyindra

Meuse karieng tho siuroe

Meunoe hai adoe barang jan masa

Lalu jisuet bak inong jaroe

Tuan putroe jok keu panglima

Oh sajan jicok uleh samlakoe

Jisoh u jaroe uleh panglima

Adoe teungku uleebalang

Na dum geantueng u jaroe gata

Yohnyan jitron putroe Aseuhan

Lalu jikheun bak panglima

Adak tawoe uroe dudoe  
Tasaweue kamoe adoe raja  
Oh sajan troh putroe u darat  
Jiwoe le leugat lam astana

Lawet-lawan teuduek haba nyan  
Dudoe nibak nyan poteu bungka  
Jinoe meututo Malem Dagang  
Panglima prang that peukasa

Hoka gata wali ngon karong  
Taeu jaroelon atueh jeumala  
Tacok saoh talinggang taloe  
Asoe jaroe bungka udehta

Yoh masa nyan poteu meulayeue  
Angen pi kheue reumbang paksa  
Tujoh uroe poteu meukumbang  
Troph u Banang po meukuta

Masa nyan kapai dum geubaroh  
Geulhom saoh dalam kuala  
Kri cit narit Meukuta Alam  
Raja jimeunan Iskandar Muda

Neumeusabda bak Ja Pakeh  
Guree nyang leubeh ulama raya  
Peue nanggroe nyoe Ja teungku droe  
Nyoe peue nanggroe geurasi rama

Nanggroe nyoe tuanku jimeunan  
Nanggroe Banang geurasi nama  
U tunong nyan ampon jeunulang  
Nyan nanggroe Phang asai mula

Nyan keu nanggroe putroe jeunulang  
Teumpat putroe Phang po kamoe dumna  
Adak meunan po Ja teungku droe  
Umanat putroe yoh lon bungka

Jikheun meung ka troh u laot Banang  
Bek tatot meuriam di kuala  
Meung tatot beude tamupiasan  
Patah meukhan jeuet keu dua

Meung ka patah beude meukhan  
Ngon peue talawan prang Meulaka  
Pakon meunan deelat meukatoe  
Peue pumaloe atueuh kuala

Nanggroe Banang po Ja that meutuah  
Eelia Allah sinan na dua  
Saboh meurandeh saboh meuranoe  
Ureueng po nanggroe asai mula

Poteu meusabda bak Malem Dagang  
Panglima prang that peukasa  
Neuyue cok saoh talinggang taloe  
Asoe jaroe tamong udehta

Poteu tamong kuala Banang  
Han saboh tuan ureueng teuka  
Sajan troh poteu u darat  
Neupioh siat neumeuseuninya

Poteu meusabda bak Malem Dagang  
Maken girang that guranta  
Malem cuba tot beude meung sigo  
Suara beutanggoe sigala donya

Sangkira na sinan raja Jho  
Pantah jisawo beude nyang raya  
Sangkira na jisawo reujang  
Pantah tamuprang po panglima

Sigo geutet beude di Aceh  
Han soe taleh dalam kuta  
Han soe taleh han soe sawo  
Raja Jho tan dalam kuta

Raja Si Ujut hana di nanggroe  
Ka leupah jiwoe u Jho Lama  
Raja Si Ujut sangat sosah  
Jikeumeurah sigala donya

Jipeucakab sigala rakyat  
Jipeurok pakat jeueb peutua  
Jikeumeung prang nanggroe Aceh  
Jikeumeung puweh po meukuta

Jikheundak tawan aneuk iseulam  
Siat sajan jiteng areuga  
Aneuk iseulam dum jikheun jipubloe  
Sigala nanggroe jiteng areuga

Nyang han jitem bloe meuh pirak  
Peue nyang galak keu u muda  
Bak sikaphe meuteukabo  
Bit raja Jho seumeuah ria

Na sijamong beude meukumbang  
Ili di Banang po meukuta  
Lalu jitron jareueng-jareueng  
Poteu geuampeueng ngon bala tantra

Meung boh kayee meureuribee  
U ngon teubee han teukira  
Tujoh biduk tujoh sampan  
Nyang tron sajan u kuala

Di likot nyan maseng-maseng  
Tujoh banteng nyang raya-raya  
Oh sajan troh ka u pasi  
Troph geuili u kuala

Sajan meuteumeung ngon Malem Dagang  
Panglima prang that peukasa  
Lalu meututo jaromudi  
Nyang na turi barang peue basa

Na tadeungo po samlakoe  
Pane nanggroe po get basa  
Kueu tajak that mupadan  
Ngon angkatan bala tantra

Kamoe nanggroe that bit jeuoh  
Lheueng tujoh boh nanggroe gata  
Nanggroe kamoe bukon le sageh  
Kamoe ni Aceh Pulo Ruja

Adak takheun jeuoh nanggroe  
Peue butteu keunoe po get basa  
Kamoe nyang troh tuan keunoe  
Neudeungo jinoe meucalitra

Adak na untong nibak Allah  
Meukeumeung meulangkah u Jho Lama  
Meujak peungon Meukuta Alam  
Raja jimeunan Iskandar Muda

Beukeuna Allah bri umuku lanjot  
Kuseutet Si Ujut meunalee jiba  
Keureuna Si Ujut di nanggroe Aceh  
Yoh nyan jadeh meureubot raya

Asoe peukan habeh jireubot  
Ladong jitot ngon Krueng Raya  
Padum ngon poteu jipumalee  
Kawai siribee rumoh raja

Lapan boh pukat nyang ka jitawan  
Limong ploh rakan sajan jiba  
Dua droe pawang jipoh mate  
Jigantong bangke di mieng kuala

Ladom jiboh kawe di rueng  
Ladom di reukueng jicawiek jungka  
Buet Si Ujut hana cakab  
Ladum jiglab jipeuseksa

Nyan keu sabab nyang troh keunoe  
Bak nanggroe nyoe ka meuteuka  
Adak meunan po samlakoe  
Pat saleh droe po meukuta

Adak meunan po samlakoe  
Pat meuteumeung kamoe ngon po meukuta  
Lahka meugah aneuk meulintee  
Meukeundak meuteumee meungieng mata

Lahka teuka u ateueh nanggroe  
Mumumat jaroe sare meulia  
Yoh nyan meuhaba ngon raja Phang  
Malem Dagang meucalitra

Patot hai po mubri adat  
Mubri horeumat keu po meukuta  
Adak meunan ampon meukatoe  
Neueu keu jaroe ateueh jeumala

Mumeutanggoh meung saboh at  
Mupeutok pakat bak sroepada  
Tieb-tieb ureueng jamee  
Patot mubri thee bak sroepada

Ampon tuan bek beusalahan lon  
Tuan jak kheun bak sroepada  
Jinoe neujak Malem Dagang  
Panglima prang that peukasa

Oh sajan troh bak Meukuta Alam  
Malem Dagang jingadab sigra  
Ampon tuanku meuribee ampon  
Seumah ulon namiet nyang hina

Seumah saleuem nibak raja Phang  
Nyan keu tuan duli sroepada  
Ampon tuanku meureuribee  
Geukheundak meuteumee ngon sroepada

Lahka teuka u ateueh nanggroe  
Neumumat jaroe sare meulia  
Adak nyu meunan takheun uleebalang  
Tatueng beureujang keunoe sigra

Adak putroe ka u Aceh  
Nyang goh saheh meung ayahanda  
Jinoe jijak Malem Dagang  
Jitueng raja Phang pantah sigra

Meung sajan troh Malem Dagang  
Reujang-reujang jipeukek sabda  
Ampo tuanku seumah deelat  
Habeh pakat po meukuta

Habeh janji udeh jak reujang  
Po junjongan duli meukuta  
Jinoe jijak Malem Dagang  
Ngon raja Phang pantah sigra

Ban sajan troh ka jingadab  
Jaroe jibeutot ateueh jeumala  
Deelat tuanku syahi alam  
Nyang mee geunggam alam donya

Ho bu langkah deelat meukatoe  
Siri sagoe neukheundak hala  
Ho bu neujak nanggroe lam uteuen  
Peue keusukaan dalam rimba

Lalu meusabda Meukuta Alam  
Raja jimeunan Iskandar Muda  
Jakalee na untong nibak Allah  
Meukeumeung meulangkah u Jho Lama

Beukeuna Allah bri umulon lanjot  
Lonseutet si Ujut meunalee jiba  
Keureuna Si Ujut di nanggroe Aceh  
Yoh nyan jadeh meureubot raya

Pakri tuanku neuprang Banang  
Neukheundak teuntang u Jho Lama  
Na tatuoh peureubutan Si Ujut  
Laman sroepada kuyot hana tara

Tuanku Si Ujut kaya nang mbah  
Mudai uropah han jituhu ba  
Mupadan bah tulong tuanku  
Pakri mabantu po meukuta

Bak pihak ek tuanku poh mate  
Troh an page jeuet keu nama  
Beukeuhan mate si aneuk jalang  
Kamoe jiprang di likot meukuta

Nanggroe pi jiprang rumoh pi jitot  
Habeh jireubot sigala donya  
Bukon bubarang piek Si Ujut  
Buet nyang bacut jipeuraya

Habeh jitawan aneuk iseulam  
Siat sajan jitueng areuga  
Lalu meusabda Meukuta Alam  
Raja jimeunan Iskandar Muda

Bek neutulong kamoe siseun nyoe  
Bek neubantu uleh gata  
Jikalee na untong bak siseun nyoe  
Bak keu di droeneu lakee doa

Jakalee na untong nibak Allah  
Jadeh meulangkah u Jho Lama  
Lalu neumuehon neulakee droe  
Neumudek jinoe sigra-sigra

Teuma Raja Phang neubungka neuwoe  
Tinggi jinoe po meukuta  
Poteu bungka u nanggroe timu  
U kuala Jho le neuhalia

Tujoh uroe tujoh malam  
Peujam daratan saphan-sapha  
Poteu pi troh u kuala Jho  
Neutot meuo-o meuriam raya

Lhee go neutot beude di laot  
Han soe sambot dalam kuta  
Raja Si Ujut tan di nanggroe  
Lhee buleuen tan jiwoe dalam kuta

Jih ka leupah u Jho Bali  
Jijak saweue teumpat jiraja  
Jipeucakab sigala rakyat  
Jipeurok pakat jeueb peutua

Jikeumeung prang nanggroe Aceh  
Jikeumeung puweh po meukuta  
Poteu teungoh ka u darat  
Neupeuget teumpat di Jho Lama

Neupeuget teumpat that mupadan  
Neupeuteungoh ngon bala tantra  
Neupeuget kuta tujoh lapeh  
Meujeujineh ngon alat seunjata

Nyang silapeh that meuhalak  
Tanoh geutambak peuet panca indra  
Silapeh treu that meucakab  
Batee teunarob sare rata

Silapeh treu that meulo-lo  
Tanoh geulabu silapeh kuta  
Nyang silapeh neuyue cradi  
Tanoh kawi geucat rata

Neuyue peuget teupin sungoe  
Teumpat manoe meuseusuka  
Neuyue peuget pasang si ikat  
Geupeuget madat bak duek raja

Bak cuko ok bak koh gukee  
Teumpat keumawai that meutahta  
Ka geupeutren ngon meuriam  
Geuato dum dalam kuta

Geuato meuriam siseun tujoh  
Ka neuyue boh nyang raya-raya  
Geuato meuriam nyang seudang-seudang  
Meujampu ngon lila teumaga

Tangieng di jeuoh that meuhalak  
Keunong sanjak bangon kuta  
Ka meucakab ngon meuriam  
Meuse geuandam jroh that rupa

Tujoh buleuen poteu sinan  
Ureueng Jho han saboh teuka  
Ureueng Jho teungku habeh teumakot  
Habeh kuyot ban sineuna

Tapaban tron dum u pasi  
Pakri taili u kuala  
Di kuala raja Aceh  
Nanggroe Saheh di Pulo Ruja

That karollah Meukuta Alam  
Neukeumeung geunggam ban saboh donya  
Beukeu ek rakan nyan tapuweh  
Sit keu leubeh geutanyoe dumna

Adak talo geuprang nanggroe nyoe  
Mate geutanyoe keunong meureuka  
Oh ban neuwoe raja Si Ujut  
Geutanyoe neulhut neuteung nyawa

Jaroeteu neukoh gaki neupuntong  
Ladom neusrong dalam sula  
Siteungoh ri neukoh jaroe  
Neugugajoe neuplah dua

Bukon jheut that piek Si Ujut  
Buet nyang bacut jipeuraya  
Tujooh blah buleuen poteu di Jho  
Leumah keu musoh bak panglima

Leumah keu musoh bak Malem Dagang  
Panglima prang that peukasa  
Kapai jidong dum di laot  
Tihang seupot sang bak nala

Kapai jidong dum meuranjo  
Bangon pulo di laot raya  
Malem jidong di ulee kurong  
Jibileueng-bileueng na limong laksa

Laen meuron-ron dum di likot  
Kapai Si Ujut han lale teuka  
Jinoe meututo Malem Dagang  
Panglima prang that peukasa

Hai Ja payong Ja Madinah  
Ulon Allah teugoh seutia  
Tabri idin po Ja jeunulang  
Kucuba prang kaphe cilaka

Han mee kueu po Ja kaphe  
Ureueng meuungki keu agama  
Meung na tatuooh ateku saket  
Ulon bicah phet sigala anggeeta

Meung kupike keu meunalee  
Cot ngon bulee mirah ngon mata  
Jikheun jiprang geutanyoe Aceh  
Jikheun jipuweh po meukuta

Jikheun jitawan geutanyoe iseulam  
Siat sajan jipubloe ba  
Aneuk iseulam jikheun jipubloe  
Sigala nanggroe jitueng areuga

Nyang han jitem bloe ngon meuh pirak  
Peue nyang galak keu u muda  
Bak si kaphe meuteukabo  
Bit raja Jho seumeuah ria

Jinoe meututo po Ja Pakeh  
Guree nyang leubeh ulama raya  
Cuco bek dilee tapangkai prang  
Goh lom reumbang keunong kutika

Kumeutanggoh dua lhee uroe  
Malem samlakoe beutasaba  
Bek le po Ja tameutanggoh  
Jaroeku siploh atueuh jeumala

Han mee kueu si aneuk jalang  
Han mee kupandang kaphe cilaka  
Han kupateh kutika Sulaiman  
Kutika nyan tan peureucaya

Kuseutet kutika Soidina Ali  
Uroe barang ri pi keunong kutika  
Bah keu jidong ban peuet meudeuhab  
Taeu kupeurab kaphe cilaka

Ja payong meukuta nanggroe  
Si uroe-uroe na peut kutika  
Jeh oh jameuen kuguree prang  
Uleebalang hantom meudakwa

Pakon Po Malem hana meulagee  
Tabantah guree lagoe gata  
Nyang kutem jak di nanggroe Madinah  
Allah peuleumah bahgia gata

Meung ka kucre nanggroe Meureudu  
Aneuk teungku kukeumeung peulahra  
Sangkira kon gata sidroe  
Han kucre nanggroe kuttinggai tangga

Adak nyo gata ureueng nyang pham  
Bek po Malem tameudakwa  
Bek kaseutet sinobari  
Han meukri-kri jeuet binasa

Aneuk kaseutet sinobari  
Beuna ngon suci bek talupa  
Malem tatamong dalam bukot  
Jakleh talob lam gumtia

Malem tatueng ngon ie seumayang  
Tacok kuruan jak tabaca  
Malem neupike ubak ate  
Kaman bahle ban kheun gata

Meung kudakwa po Ja Pakeh  
Gata jadeh ek binasa  
Peue bu hase kuharab keu gah  
Gadoh tuah tinggai nama

Malem jiteng ngon ie seumayang  
Jicok kuruan jibaca sigra  
Sajan leupah Malem u dalam  
Meututo yoh nyan Ja ulama

Bujang tabungka keudeh u timu  
U nanggroe Jho taseutet raja  
Jak taseutet Meukuta Alam  
Raja jimeunan Iskandar Muda

Raja budiman ade sangat  
Peutimang rakyat ban neuraca  
Adak na gaseh deungon sayang  
Tayue neuriwang di Jho Lama

Neupeuseumah le Ja Pakeh  
Guree nyang leubeh ulama raya  
Beukeuna gaseh deungon sayang  
Neutulong prang bantu panglima

Takheun musoh teuka di laot  
Tihang seupot sang bak nala  
Kapai jidong dum meuranjok  
Bangon pulo di laot raya

Meung han neubantu Malem Dagang  
Po Ja neuriwang u Pulo Ruja  
Bah neupuwoe u nanggroe Aceh  
Bahle bek jadeh prang Meulaka

Laman ka mate Malem Dagang  
Han soe pangkai prang singoh lusa  
Adak siribee tapeuek laen  
Hana meuchen meuse panglima

Adak taboh laen geunantoe  
Hana mubudok meuse panglima  
Bujang jibungka u nanggroe timu  
Lanja u Jho seutet raja

Tujoh uroe peulayaran  
Peujam daratan saphan-sapha  
Tujoh uroe peulayaran  
Troh keu yohnyan u Jho Lama

Oh sajan troh u kuala Jho  
Jitot meuo-o meuriam raya  
Lhee go jitot beude disinan  
Soe sawo han dalam kuta

Kri cit narit Meukuta Alam  
Raja jimeunan Iskandar Muda  
Adoe teungku Raja Raden  
Ureueng get baten teugoh seutia

Peue beude nyan meugrupoh  
Pane musoh keunoe teuka  
Saleh Si Ujut teuka keunoe  
Bak nanggroe nyoe u Jho Lama

Saleh musoh jak prang nanggroe  
Saleh Si Ujut woe di nanggroe Guha  
Tapeuingat sigala rakyat  
Tapeurok pakat jueub peutua

Meung Si Ujut troh u nanggroe nyoe  
Habeh geutanyoe haro-hara  
Maseng-maseng alat di jaroe  
Peucakab droe dum beurata

Janan meututo Raja Raden  
Ureueng get baten teugoh seutia  
Ampon tuanku syahi alam  
Seumah laman duli meukuta

Bukon musoh jak prang nanggroe  
Kon Si Ujut woe sideh di Guha  
Kon Si Ujut teuka keunoe  
Bak geutanyoe u Jho Lama

Nyan keu biduek bak Ja Pakeh  
Haba nyang sageh neuyue calitra  
Na sijamong poteu mupioh  
Biduek pi troh bak Ja ulama

Ampon tuanku syahi alam  
Seumah laman duli sroepada  
Neupeukek seumah Kuja Pakeh  
Guree nyang leubeh ulama raya

Beukeuna gasehneu ngon sayang  
Neupeungon prang bantu panglima  
Musoh ka jidong tuanku  
Di laot tihang seupot sang bak nala

Malem jidong di ulee kurong  
Jibileueng-bileueng na limong laksa  
Malem jimuprang di laot Banang  
Musoh meukumbang le that teuka

Laen meuron-ron dum di likot  
Kapai Si Ujut han lale teuka  
Beukeuhan neubantu Malem samlakoe  
Po ja neupuwoe u Pulo Ruja

Poteu deungo meunan areutoe  
Neuhei jinoe raja Meulaka  
Adoe teungku Raja Raden  
Ureueng get baten teugoh seutia

Raja Raden darosalam  
Nyang mee geunggam nanggroe Meulaka  
Toh bu pike toh bu lagee  
Peue eleumee siri bicara

Seumah saleuem Kuja Pakeh  
Guree nyang leubeh ulama raya  
Kuja Pakeh neuyue tariwang  
Tajak tulong prang bantu panglima

Talhoh bale tatot keudeh  
Geutanyoe bek udehta bungka  
Adoe tareuloh pasang si ikat  
Tareuloh ngon madat teumpat duek raja

Bak cuko ok bak koh gukee  
Teumpat keumawai that meutahta  
Na bek jiduek bak teumpat kee  
Kaphe asee laknat raya

Geureuloh bale geutot keudeh  
Hana lale poteu bungka  
Poteu bungka du kuala Jho  
Neutot meuo-o meuriam raya

Geuseupot gong geupuh canang  
Geupuh geundrang hareudom mama  
Geutarek layeue peukong tali  
Kapai jititi u laot raya

Jitron angen budueng-budueng  
Kapai jiplueng meuleulum ba  
Angen jitron seupoi-seupoi  
Meugeugasoe jiplueng behtra

Ladom klasi jiteumim bang  
Ladom dagang lakee doa  
Ie di ulee sang bungong meulu  
Kapai meutabu di laot raya

Adu payong meugalak-galak  
Geunta jihayak Cakra Donya  
Yoh masa nyan poteu meulayeue  
Angen pi kheue keunong paksa

Tujoh uroe kapai meukumbang  
Troh u Banang po meukuta  
Sajan meuteumeung ngon Kuja Pakeh  
Guree nyang leubeh ulama raya

Ampon tuanku syahi alam  
Seumah laman duli meukuta  
Ka neutajo neucom di teuot  
Poteu surot neubri meulia

Na sijamong poteu pioh  
Oh tho reuoh neumeuseuninya  
Janan jiteubiet Malem Dagang  
Panglima prang that peukasa

Ampon tuanku syahi alam  
Seumah laman duli sroepada  
Tuanku ka treb nibak kamoe  
Neubungka ninoe u Jho Lama

Peue haba prang nanggroe timu  
Neubungka u Jho po neukuta  
Padumna kaphe nyang ka talo  
Nyang ka rudok bak po meukuta

Oh poteu deungo meunan areutoe  
Poteu iem droe masam ngon muka  
Pakon po Malem hana meulagee  
Kamoe tapumalee di nab mata

Bit dumnan treb teupeulanteng  
Hana mumuprang di Jho Lama  
Bak pihak tan raja Si Ujut  
Peue meutuntot po panglima

Raja Si Ujut tan di nanggroe  
Ka l eupah jiwoe u nanggroe Guha  
Hana mumuprang di kamoe ngon rakyat  
Srot meureutabat kamoe raja

Kupaban muprang hana padan  
Bukon lawan sabé padra  
Adak Si Ujut na di nanggroe  
Tathee kamoe prang meurada

Ampon tuanku syahi alam  
Seumah kaman duli sroepada  
Kon mubangket kon mupumaloe  
Ampon tuanku namiet meuseunda

Neupumeuah neupeuampon  
Deesa ulon bak po meukuta  
Neubri idin deelat jeunulang  
Kucuba prang kaphe cilaka

Neubri idin kupoh si kaphe  
Ureueng meuungki keu agama  
Peue na takheun po Malem  
Bak kamoe sit leubeh droe Ja ulama

Meung ka neuyue uleh Ja Pakeh  
Barang jan jadeh prang tarada  
Jinoe meututo po Ja Madinah  
Ulon Allah teugoh seutia

Cuco teungku Malem Dagang  
Tapubeudoh prang cuco bak gata  
Tabeudoh cuco uleebalang  
Tabri gurangsang bak rakyat dumna

Uroe malam cuco tan teudoh  
Kuruuan lhee ploh di kee kubaca  
Bek katakot bek kamalee  
Na sajan kee lakee doa

Uroe malam kubeuet surat  
Doa kramat kayem kubaca  
Kuseumayang geunab uroe  
Tuhan kupujoe hantom reuda

Kuseumayang dua rakaat  
Kumeuhon syupaat keu panglima  
Peue katakot uleebalang  
Tapangkai prang cuco bak gata

Kon meung geutanyoe taprang Yahudi  
Nibak Nabi asai mula  
Masa neuprang kaphe le nabi  
Tuanteu Ali neuboh panglima

Bak uroe nyoe raja muprang  
Malem Dagang neuboh panglima  
Cuco takheun droe ubak Allah  
Tameuhon titah ngon bahgia

Cuco takheun droe ubak nabi  
Beuna ngon suci han binasa  
Beureukat syupaat soidina Ali  
Poteu Allah bri kuat kuasa

Meung mee kucre nanggroe Meureudu  
Poteu Allah bantu nabi peulahra  
Masa kucre nanggroe Madinah  
Aiaih peuleumah saboh rahsia

Beudoh cuco Malem Dagang  
Poteu Allah peutimang barang jan masa  
Jinoe jibeudoh Malem Dagang  
Panglima prang that peukasa

Hoka gata wali ngon karong  
Taeu jaroelon atueuh jeumala  
Beudoh bandum rakan sahabat  
Tatueng ie klat dum dum beurata

Tacok saoh talinggang taloe  
Asoe jaroe bungka udehta  
Bahle tadong uleebalang  
Kutika reumbang haba ulama

Oh jideungo haba mumeunan  
Jibeudoh yohnyan sigra-sigra  
Yoh nyan jinoe jiteubiet u laot  
Beude jitot meugumpita

Geupumeuriam bak si kaphe  
Ureueng meuungki keu agama  
Sare simban boh meuriam  
Geupioh sinan tuan panglima

Na sijamong geumupioh  
Sare tho reuoh dumgeu rata  
Kri cit narit Kuja Pakeh  
Guree nyang leubeh ulama raya

Beudoh cuco Malem Dagang  
Kutika reumbang po panglima  
Jinoe jibeudoh Malem bangsawan  
Jicok peukayan meungui panglima

Dilee jisok bajee sukaleuet  
Bak siseun jeuet meuhambo cahya  
Di atueuh nyan bajee direh  
Teuma silapeh bajee teumaga

Sajan jicok tunam u jaroe  
Malem samlakoe jadeh jimeujra  
Malem jidong di ulee kurong  
Jareung-jareung langkah tiga

Langkah tiga jilhom tujoh  
Malem jipeuroh langkah tiga  
Langkah tujoh jilhom sikureueng  
Lagee jareueng meuen panglima

Sajan jitot di jaroe tunam  
Kapai kaphe lham dua ploh dua  
Beudoh di uneun Raja Raden  
Lham nyang laen dua ploh dua

Beudoh di wie panglima Pidie  
Hana meusie ban geujangka  
Lheeji santeut ngon Malem Dagang  
Sang geutueng saboh jangka

Jineo teuceungang nyan si kaphe  
Ureueng meuungki keu agama  
Bak sikaphe hana lagee  
Allah tipee nabi peudaya

Jissangka kon ureueng Aceh  
Si kaphe jadeh Allah peudaya  
Jisangka nyo ureueng Banang  
Han jilawan jitakot keu raja

Maka meututo tha Si Ujut  
Nyan geuseubot raja Guha  
Nama jimeunan Raja Modeulikah  
Nyan keu ayah judo raja

Nyan keu tuan Raja Si Ujut  
Kaphe lakanat biek Ulanda  
Putroe geupeunan Halawiah  
Sangat indah atueuh donya

Yoh nyak jimarit Raja Modeulikah  
Bak kapilah kaphe Ulanda  
Pakon meunan ureueng Banang  
Habeh bandum sisat raya

Jipumeuriam geutanyoe rakan  
Jikira lawan bak ri rupa  
Jikira musoh dum geutanyoe  
Pakri jinoe toh bicara

Maka seuot ureueng sidroe  
Ureueng lakoe hibat rupa  
Nyan geupeunan Camsalawi  
Han jitukri kheun bicara

Deelat tuanku tangke ate  
Han kutukri le bicara  
Yoh nyan Jimarit sabe keudroe-droe  
Sira jihei rioh kabra

Allah hai Tuhan Maia Uroe  
Meunoe jinoe neubri bala  
Masa neukheun po geutanyoe  
Kapai sinoe neupeucalitra

Neukheun dilee kapai di Banang  
Bak bilangan na lhee laksa  
Baro jiteubiet kapai siribee  
Meudilee-Hilee meuleulumba

Peue jidu dum di gampong  
Mangat untong teutab jaba  
Geutanyoe nyang jeuoh nyoe ho ka troh  
Peue lom jiduek di rumoh tangga

Rakan teungku rakan badan  
Bek talawan jih syeedara  
Malem Dagang hana lale  
Jipubeude ngon ramtaga

Malem Dagang hana lagee  
Cot ngon bulee mirah ngon mata  
Maken keubit that jipumeuriam  
Le that ka lham kapai ngon behtra

Teuma jimarit sidroe kaphe  
Nan geurasi Abdo Luha  
Allah teungku rakan badan  
Bek talawan bahle pahna

Bek talawan rakan badan  
Bek beusalahan bak poteu raja  
Dudoe jan teuka Raja Si Ujut  
Geutanyoe neulhut neuteng nyawa

Jaroe neukoh gaki neupuntong  
Ladom neusrong neuboh lam sula  
Siteungoh ri neugugajoe  
Dum geutanyoe neuplah dua

Ladom neuboh kawe di rueng  
Ladom di reukueng neucawiek jungka  
Po geutanyoe larab that jahe  
Ladom neukawe di kulet mata

Bukon that jheut Raja Si Ujut  
Buet nyang bacut neupeuraya  
Hana lale Malem Dagang  
Jipangkai prang that peukasa

Ho jipeurab Malem Dagang  
Le that lapang kaphe cilaka  
Ho jipeurab Malem samlakoe  
Kaphe jimoe baheh meuriba

Bukon that le mate si kaphe  
Ureueng meuungki keu agama  
Adak sangkira mate di darat  
Meuhat-meuhat silagoe guda

Pihak mate dalam laot  
Seb troe eungkot cot ngon raya  
Kapai jilham habeh keng-keung  
Jeuet keu kareueng jeuet keu bata

Ka ke mate Raja Modeulikah  
Tinggai kapilah siploh behtra  
Behtra siploh pi jareueng-jareueng  
Habeh jiplueng u nanggroe Guha

Lawet lawan dudoe nibak nyan  
Tinggai haba nyan laen takira  
Lalu meugah bacut-bacut  
Bak Si Ujut u nanggroe Guha

Meugah tuanji ka mate  
Jimoe sare putroe ngon raja  
Nama jimeunan putroe Beureuhut  
Judo Si Ujut aneuk raja

Yoh nyan jibaek that meuo-o  
Allah hai ku mate gata  
Nyang khot mate sit kee dilee  
Beu taba kee aneuk raja

Allah hai du tangke ate  
That weueh ate aneuk gata  
Di halawiah di jih jiruhe  
Gata ka mate judo raja

Yoh nyan jikheun bak jibae  
Wahe judo Keumala Donya  
Takheun tajak prang nanggroe Aceh  
Hana jan troh judo raja

Gata mate di laot Banang  
Habeh badan judo panglima  
Adak kuthee judo tamate  
Hareuem han kubri gata bungka

Allah hai judo weuehku lagoe  
Ho kuboh droe bahle pahna  
Teutab oh nan nyang haba nyan  
Nyoe kurangan laen kurika

Kri cit meututo putroe Beureuhot  
Judo Si Ujut aneuk raja  
Nyan keu aneuk Raja Modeulikah  
Halawiah geuheu bunda

Yoh nyan jimarit ngon Si Ujut  
Putroe Beureuhut ro ie mata  
Ie mata ro meuteutaloe  
Ri geumanoe basah muka

Allah hai judo ureueng lakoe  
Taeu jaroe atueh jeumala  
Peue lom judo taduek di gampong  
Mangat untong teutab jaba

Du ku mate di dalam prang  
Di gata talinggang lam astana  
Allah hai judo tajak reujang  
Tatueng bila wang di laot raya

Peue lom judo taduek di nanggroe  
Tajak keu jinoe judo raja  
Tapandang kamoe han peue tanyong  
Limong-limong siseun geuba

Hatle tadong uleebalang  
Tabantu prang u laot raya  
That karollah Meukuta Alam  
Habeh jigeunggam ban saboh donya

Nyang ka dilee judo kudeungo  
Goh geutueng peurumoh aduen gata  
Tuanku geureubot bak Raja Raden  
Ureueng get baten teugoh seutia

Nyang tan di gob na di geutanyoe  
Ureueng binoe jipeutuka  
Geutueng di gobnyan putroe Phang  
Keujih geupulang nyang ri meurua

Geutueng di gob nyang sambinoe  
Keu geutanyoe nyang ri waba  
Lahna geutem bri putroe Aceh  
Teuriseh-riseh aduen gata

Judo payong han get lagee  
Hana malee ban sibaka  
Meung ka talo geuprang nanggroe  
Geutueng kamo di jaroe gata

Geutueng kamoe han peue tanyong  
Limong-limong jroh-jroh rupa  
Peue lom judo taduek di nanggroe  
Tajak keu jinoe judo tabungka

Meung ka mete aneuk rakyat  
Soe deelat singoh lusa  
Habeh nanggroe jeuet keu uteuen  
Habeh mideuen jeuet keu rimba

Jitron badeuek nyan ngon gajah  
Padumna indah na meung gata  
Jakleh jineo deelat togayue  
Tatueng bila duku sroepada

Judo teungku droe duku mate  
That meusampe neutueng gata  
Neutueng gata neukeumeung keu gah  
Mate ngon ayah tan na bila

Beukeuhan mate tapoh bila dua  
Judo bek kueu barang jan masa  
Di donya kon troh u akhirat  
Hareuem teebat bek kungieng mata

Jeh oh lawet kupeutulak  
Han neutem jak hai sroepada  
Narit leumbeng han tatupeue  
Phet di keunoe judo raja

Ohnan lawet kupeukeudi  
Phet di gaki meuse rusa  
Si Ujut deungo meunan areutoe  
Si aneuk bisoe beungeh raya

Mate aneuk ureueng binoe  
Pakon meunoe paleh pinta  
Mangat kuduek kam meuligoe  
Jiyue jak jinoe jalang meureuka

Ureueng binoe that han meukri  
Jiboh campli rok-rok masa  
Mangat kuduek geupeutulak  
Meunyeum ka jlak jalang meureuka

Kapreh keu kah meung mate kee  
Kaduek balee si umu donya  
Adak mate ureueng lakoe  
Tujoh geunantoe laen kumita

Han kuharab keu areuta kah  
Le areuta mbah tinggai beulanja  
Nyang han kutron jalang bisu  
Hana si uroe keunong kutika

Sigo kungieng dalam surat  
Hana sapat keunong kutika  
Keunong kutika di ureueng Aceh  
Meutuah leubeh ureueng Pulo Ruja

That rayeuk tuah Meukuta Alam  
Ek jigeunggam ban sigala donya  
Duaji sabe ngon Kuja Pakeh  
Guree nyang leubeh ulama raya

Lheeji santeut ngon Malem Dagang  
Panglima prang that peukasa  
Peuetji sabe ngon Raja Raden  
Ureueng get baten teugoh seutia

Limongji sapeue ngon panglima Pidie  
Ureueng nyang giek nibak raja  
Limong ureueng nyan that meutuah  
Kupaban bah teugoe kuraja

Adak kutron jalang bisoe  
Kee siuroe jadéh binasa  
Si Ujut jitron ka u bale  
Jihei bujang le pantah sigra

Hoka gata bujang peuet ploh peuet  
Nyang sare jeuet mubicara  
Jakleh mudek bujang u tunong  
Kame mong-mong jak seuranta

Kayue jitron uleebalang di lúa  
Di blang ureueng keukaya  
Ulon kaseutet tunong baroh  
Sikureueng ploh kuyue tron raja

Saboh nanggroe nyoe nyang kugeunggam  
Lhee are jra itam rukon peutua  
Lhee cupak nyang goh mate  
Jitron beu sare jak tueng bila

Mate aneuk raja Aceh  
Jinoe kupeh-peh kupubloe ba  
Bujang jimudek ka u tunong  
Jime mong-mong jijak seuranta

Jitron rakyat dum meuree-ree  
Seun siribee seun silaksa  
Habeh jitron tunong baroh  
Hana teudoh ubak raja

Umu lhee buleuen jikeumeurah  
Rakyat boh-bah ban ie raya  
Habeh ka jitron bandum nanggroe  
Meuhimpon keunoe ubak raja

Jilhom kapai beungoh seupot  
Peunoh laot nanggroe Guha  
Habeh jilhom di aneuk nanggroe  
Jilhom dudoe kapai raja

Oh sare roh bak meusaket  
Jilhom peungapet Raja Guha  
Jilhom limong mubajee beusoe  
Jitron di nanggroe prang jirada

Jilhom dua boh mubajee pirak  
Ho nyang jijak tihang suasa  
Binteh bukot that meulo-lo  
Meuh sinadu mupeureumata

Ulee kurong meuteurapan  
Piduek ngon intan mupeureumata  
Yoh nyan Si Ujut jimeulayue  
Angen pi kheue keunong paksa

Tujoh uroe tujoh malam  
Troph keu tuan u babah Guha  
Ban sajan troh u babah gugob  
Si Ujut jilob dalam guha

Di atueuh gunong di yub laot  
Si Ujut lob ret lam guha  
Lalu meututo raja Si Ujut  
Kaphe kuyot tan agama

Rakan taek keudeh u manyang  
Tatot meuriang di atueuh guha  
Saleh na sideh ureueng Aceh  
Saleh jipreh beuladeh guha

Bak pihak na rajaan jipreh  
Na bek jadeh talob lam guha  
Meung meurumpok dalam gugob  
Han tatuho lob glab gulita

Sajan jitot beude di manyang  
Soe taleh tan beuladeh guha  
Han soe sawo han soe taleh  
Ureueng Aceh sinan hana

Lalu jilob dum meuree-ree  
Seun siribee seun silaksa  
Habeh ka jilob leupah nibak nyan  
Trok keu tuan lua guha

Di babah guha kapai meuriti  
U Jho Bali ka troh raja  
Di Jho Bali dum mupeuduek  
Lanja jinoe u Jho Lama

Di Jho Lama kapai meukumbang  
U laot Banang peunoh rata  
Oh sajan troh u laot Banang  
Meuteumee yoh nyan ngon po meukuta

Allah hai rakan tangke ate  
Jeh leu peue le ureueng Pulo Ruja  
Hana payah le tajak u nanggroe  
Ka jieuntat droe keunoe teuka

Ureueng Aceh that meuuntong  
Seulumpuek jantong keunoe jiba  
Bit na jiba kapai siribee  
Saboh kapai kee hana areuga

Bek tapubeude ureueng Aceh  
Si uroe nyoe jadeh talet lingka  
Rakan payong uleebalang  
Tapeugeundrang talet lingka

Nideh ninoe tapeugeundrang  
Ngon geulumbang lham dum rata  
Nideh ninoe meujaphok  
Ngon ceuraceuk gadoh dumna

Jinoe ka jilet lingka peuet sagoe  
Jipoh ngon droe poteu raja  
Jilet di tunong jilet di baroh  
Sare kukoh jilet raja

Jilet di timu ngon di barat  
Poteu jilet peuet panca indra  
Poteu meukuta Alam meunyeum teumakot  
Lalu kuyot pucat muka

Jinoe neumeuhei Malem Dagang  
Panglima prang that peukasa  
Toh bu pike toh bu laku  
Toh eleumee sare bicara

Geutanyoe jilet lingka peuet sagoe  
Ho taboh droeteu panglima  
Meuse eungkot Malem lam jang  
Bak kupandang han leumah donya  
Kutangoh u manyang leumah awan  
Laen sapeue tan peujam donya  
Kungieng u yub ie ngon bumoe  
Laen peuet sagoe jilet lingka

Janan meututo Malem Dagang  
Panglima prang that peukasa  
Bek neugundah bek neutakot  
Hana kuyot laman sroepada

Adat tuanku nyeum teumakot  
Neulob lam bukot lam gumtia  
Meung na udeb Malem Dagang  
Kee panglima prang ngon raja Guha

Meung na udeb aneuk tunong krueng  
Bah kutheun rueng di nab sroepada  
Beukit ka mate Malem Dagang  
Han soe sayang keu sroepada

Poteu deungo meunan areutoe  
Ka keu neumoe tro ie mata  
Yoh masa nyan poteu ka teulah  
Buet ka leupah sia-sia

Adak kuthee meunoe tunggang  
Malem Dagang han kuboh panglima  
Beukeusit kuboh panglima Pidie  
Mangat meusie-sie mita bicara

Nyan roh kuboh Malem Dagang  
Keureuna biek tungang rukon mubaka  
Poteu tamong dalam bukot  
Lanja neulob lam gumtia

Neuduek pi salah neudong pi salah  
Ateneu gundah gaboh bicara  
Lalu meututo po Ja Pakeh  
Guree nyang leubeh ulama raya

Cuco teungku Malem Dagang  
Panglima prang guna biasa  
Tabeudoh cuco uleebalang  
Tabri gurangsang keu rakyat dumna

Bek katakot bek kamalee  
Na ku guree kalon kutika  
Janan jibeudoh Malem Dagang  
Panglima prang guna biasa

Malem Dagang seuu mangat  
Jaroe jibeuot atueuh jeumala  
Lom ngon badan that samlakoe  
Suara peungeuroe meunimbang rasa

Kabeudoh cuco uleebalang  
Kutika reumbang cuco raja  
Bek katakot bek kamalee  
Na sajan kee lakee doa

Ka jibeudoh Malem bangsawan  
Jicok peukayan meungui panglima  
Sajanjisok bajee sukaleuet  
Bak siseun jeuet meuhambo cahya

Di ateueh nyan bajee direh  
Teuma silapeh bajee teumaga  
Malem jidong di ulee kurong  
Jareueng-jareueng langkah tiga

Langkah limong jilhom tujoh  
Malem jipeuroh langkah tiga  
Langkah tujoh jiboh sikureueng  
Lagee jareueng meuen panglima

Sajan jitot di jaroe tunam  
Kapai kaphe lham dua ploh dua  
Beudoh di uneuen Raja Raden  
Lham nyang laen dua ploh dua

Beudoh di wie panglima Pidie  
Hana meusie han geujangka  
Lheeji santeuet ngon Malem Dagang  
Ban geutueng saboh jangka

Laen nibak nyan teuma di rakyat  
Han teukhimat han ek kira  
Ho jipandang habeh ranab  
Ho jipeurab habeh meuriba

Malem jingieng wie ngon uneuen  
Rakyat jikheun-kheun ngon jibasa  
Umu lhee buleuen Malem pangkai prang  
Kapai jilham na lhee laksa

Lhee laksa lham limong laksa meugantoe  
Cit hana peue laen teuka  
Hana jithee nyang ka mate  
Laen sabe le that teuka

Adak sangkira mate di darat  
Darahji meuhat silagoe guda  
Allah bak pihak mate di laot  
Habeh troe eungkot cot ngon raya

Kapai jilham habeh keng keueng  
Jeuet keu kareueng ban sineuna  
Bukon sayang Malem Dagang  
Meukumbang prang di laot raya

Bak si kaphe beude jitaleh  
Maken leubeh nibak nyang ka  
Nibak kureueng maken meugantoe  
Meuadoe-adoe meuriam raya

Boh beude di laot sare cham-chum  
Han tatudum ban ujeueui keunong sa  
Boh beude di manyang sare jimeulot  
Boh mupalot meusingkla-singkla

Boh beude si kaphe peujam daratan  
Gadoh lam awan malaikat ba  
Sabab meutuah poteu Meukuta Alam  
Han saboh lham kapai raja

Duaneu sabe ngon po Ja Pakeh  
Guree nyang leubeh ulama raya  
Lheeji santeut ngon Malem Dagang  
Panglima prang mubahgia

Maken gupeubeude maken meujrom  
Na ri sodom seureungga  
Maken geupoh maken meuhimpon  
Siga meuron-ron keunan teuka

Gundah keu ate poteu Meukuta Alam  
Uroe malam neulakee doa  
Beusilamat Malem Dagang  
Allah peutimang nabi peulahra

Larab that treb Malem lam alon  
Rugoe sithon prang panglima  
Umu sithon Malem pangkai prang  
Hana lapang kaphe cilaka

Jipangkai prang that meusaket  
Mate peungapet tuan panglima  
Masa nyan mate panglima Pidie  
Ureueng nyang giek nibak raja

Panglima Pidie ureueng nasiha  
Trok peundapat nyang samporeuna  
Nyang goh mate sit ka jithee  
Umanat guree han jilupa

Lalu meututo panglima Pidie  
Ureueng nyang giek nibak raja  
Hai Ja payong ja Madinah  
Ulon Allah teugoh seutia

Na bu gaseh po Ja jeunulang  
Adak na sayang keu panglima  
Lalu meututo Raja Pakeh  
Guree nyang leubeh ulama raya

Cuco teungku panglima Pidie  
Ureueng nyang giek nibak raja  
Meuse kuchen keu Malem Dagang  
Meuñan kusayang aneuk keu gata

Nibak kamoe han leubeh kureueng  
Meuse kutimang bak neuraca  
Beukeuna gaseh teu ja jeunulang  
Adak na sayang keu panglima

Tabri po Ja peukayan puteh  
Ngon kumuleh ulama syeuruga  
Tabri po Ja bajee jubah  
Seunalen siyah gata ulama

Tabri po Ja ngon seureuban  
Meung keu kaphan nibak gata  
Adak kamoe troh hat masa mate  
Raseuki han le di ateueh donya

Ban neudeungo le Ja Pakeh  
Gundahneu saheh ulama raya  
Aneuk teungku panglima Pidie  
Ureueng nyang gek nibak raja

Kupaban chen uleebalang  
Kupahan sayang aneuk keu gata  
Adak aneuk nyeum tamate  
Bek kamuprang le hai panglima

Jak katamong dalam bukot  
Jakleh kalob lam gumtia  
Hai Ja teungku tangke ate  
Han olonsurot le po Ja ulama

Masa janji po Ja ngon adoe  
Lon mumat jaroe ngon panglima  
Untong kuboh jih keu panglima prang  
Uleebalang keunong rata

Yoh kupeuek di Jambo aye  
Oh lham peucrek tinggai seutia  
Adak si uroe po Ja kuplueng  
Aneuk tunong krueng jheut that guna

Masa po Ja meuikat janji  
Habeh sudi bak syeedara  
Jikheun po Ja meung soe nyang plueng  
Bak boh beude tueng hai syeedara

Jikheun po Ja soe janji runtoh  
Bak kreh pajoh alat sinyata  
Baranggaho Ja tayue plueng  
Boh beude tueng troh hat masa

Baranggajan janji runtoh  
Nyan kreh pajoh troh hat masa  
Jakalee cahit mate kuprang  
Bak Allah han kumeudeesa

Jakalee mate kuprang Yahudi  
Kuek aji luroh deesa  
Ja Pakeh deungo meunan areutoe  
Ka keu neumoe tro ie mata

Kupaban chen uleebalang  
Kupaban sayang aneuk keu gata  
Kupaban chen cuco teungku  
Troh hat umu teuka masa

Nyoe peue cuco kubri seureuban  
Meung keu kaphan po panglima  
Nyoe leu peue cuco bajee jubah  
Seunalen siah kamoe ulama

Nyoe pat kungieng cuco badan  
Kameuniet sajan kee ngon gata  
Phon jinoe kon troh an akhe  
Troh an page sajan gata

Laman kaeu bajee jubah  
Kameuniet siah sajan gata  
Phon jinoe kon troh an akhe  
Kameuniet han cre kamoe ngon gata

Nyoe peue kubri nyang nasihat  
Nyoe peundapat nyang samporeuna  
Aneuk bek taboh wasiet guree  
Page meuteumee di Padang Macha

Aneuk teungku bek kaubah janji  
Page bak titi kupreh gata  
Ban jideungo meunan areutoe  
Po samlakoe seumah ulama

Janan jibeudoh panglima Pidie  
Ureueng nyang giek nibak raja  
Ka jipeurab bak Malem Dagang  
Panglima prang that peukasa

Adoe teungku hai Malem Dagang  
Nyang pangkai prang guna biasa  
Adoe payong batee ulee  
Pioh keu dilee tuan panglima

Aduen tuengku dalem payong  
Tayue pioh lon peue bu haba  
Tapioh dilee adoe pangulee  
Kumeuteumee dilee ngon gata

Pioh sajan ngon Raja Raden  
Ureueng get baten teugoh seutia  
Adoe payong po jroh samlakoe  
Tango adoe umanat bak gata

Adoe kamoe troh hat mate  
Raseuki han le di ateuuh donya  
Adoe payong batee ulee  
Aneuk ku na lhee di jaroe gata

Si uroe nyoe adoe kupeugah kri  
Gata wali adoe panglima  
Aneuk ku lhee tapeusayang  
Tapeutimang tapeulahra

Meung bek tabri gob geurantang  
Di ret di blang keuji nama  
Jakalee adoe malee ngon ayeb  
Gata nyang udeb peudeh mata

Adak ulon sit ka mate  
Malee han le di ateueh donya  
Jakalee na udeb po puteh licen  
Kapeukawen oh na raya

Adak mate adoe teungku  
Tapeulakoe dum sikada  
Areutoe le tinggai di nanggroe  
Di gata adoe meung talira

Oh jideungo ie Malem Dagang  
Uleebalang ro ie mata  
Adak dalem nyeum tamate  
Bek tamuprang le lem panglima

Tajak dalem tatamong lam bukot  
Jakleh talob lam gumtia  
Oh jideungo le panglima Pidie  
Ureueng nyang giek nibak raja

Adoe teungku tangke ate  
Han kusurot le di kee panglima  
Janan jibeudoh Malem Dagang  
Panglima prang that peukasa

Jidong di uneun Raja Raden  
Ureueng get baten teugoh seutia  
Jidong di wie panglima Pidie  
Ureueng nyang giek nibak raja

Lalu jiek keu meuree ree  
Dua blah sukee jiek panglima  
Ho jipandang habeh ranab  
Ho jipeurab habeh meuriba

Lalu jiek Malem Dagang  
Habeh ka lapang kaphe cilaka  
Le that mate jih si kaphe  
Ureueng nyang mungki keu agama

Umu sibuleuen Malem jimuprang  
Tan meuriwang han meuriba  
Janan jibeudoh raja Si Ujut  
Kaphe kuyot tan agama

Sajan jicok beude di jaroe  
Si aneuk bisoe jadeh jimeujra  
Panglima Pidie mubajee jubah  
Jisangka siyah ulama raya

Yoh nyan Si Ujut kajisukree  
Kupoh guree keunong kutika  
Meung ka mate Kuja Pakeh  
Ureueng Aceh kupubloe ba

Sideh jilangkah jareueng-jareueng  
Sinoe teulinteueng reubah panglima  
Panglima Pidie saheh ka mate  
Ka meugule keunong di dada

Dami jikalon le Malem Dagang  
Uleebalang jinoe duka  
Dalem payong tangke ate  
Bit ka mate dalem panglima

Hai lem teungku uleebalang  
Bukon le lapang oh tan gata  
Jinoe na di wie tan di uneuen  
Han kutukri kheun lem panglima

Ka na di nab tan di likot  
Bukon kutakot oh tan gata  
Hai lem aduen bangsawan  
Siblah kuniet ka hana

Hai lem teungku batee ulee  
Bumate kee sajan gata  
Habeh haba panglima Pidie  
Ureueng nyang giek nibak raja

Ka keu hase deungon kaphan  
Geuboh seureuban Ja ulama  
Ka geupeutamong dalam bukot  
Lalu geupeulob lam gumtia

Lalu meututo Malem Dagang  
Panglima prang that peukasa  
Meutuah tuboh meutuah roh  
Beuek kupoh bila neusa

Lalu meututo Raja Raden  
Ureueng get baten teugoh seutia  
Adoe teungku Malem Dagang  
Tapubeudoh prang tapoh bila

Adoe Si Ujut tapoh bali mate  
Di kee han le kumeusyedara  
Meung han mate bila adoe  
Hareum bek tawoe u Pulo Ruja

Di donya kon troh keu akhirat  
Kaphe laknat bek keue mata  
Adak han ek uleebalang  
Panglima prang kugantoe gata

Beukeuhan meuteumee jih di Banang  
Keudeh taprang u Jho Lama  
Beukeuhan jih di Jho Lama  
U Jho Bali taseutet lanja

Beukeuhan tateumee di Jho Bali  
Keudeh tatiti u nanggroe Guha  
Beukeuhan tateumee ban peuet nanggroe  
Tariwang tawoe taprang Meulaka

Meuseuki jiplueng peujam daratan  
U gunong itam adoe tamita  
Kutukri ret nyang meusaket  
Gunong meuapet mudah ngon suka

Janan jibeudoh Malem Dagang  
Jibri gurangsang keu rakyat dumna  
Beudoh bandum rakan sahbat  
Tatueng ie klat beudoh beurata

Meuna gaseh deungon sayang  
Uleebalang tapoh bila  
Sajan jibeudoh ngon Raja Raden  
Ureueng get baten teugoh seutia

Lalu jiek ka meuree-ree  
Dua blah sukee jiek panglima  
Ho jipandang habeh ranab  
Ho jipeurab habeh meuriba

Umu lhee buleuen Malem jimuprang  
Habeh lapang ban sineuna  
Nyang na tinggai jareueng-jareueng  
Jibungka jiplueng ban sineuan

Oh sare roh bak meusaket  
Jiplueng peungapet raja Guha  
Jiplueng limong mubajee beusoe  
Ka jibeudoh droe ban sineuna

Jiplueng saboh treuk mubajee pirak  
Nyan pi jijak peungapet raja  
Habeh ka jiplueng ban sinaroe  
Tinggai meung sidroe raja Guha

Tinggai keu teungku kapai saboh  
Meung kapai jroh nyang di raja  
Adak Si ujut that kharollah  
Hana ugah keu panglima

Jinoe meuhei le Raja Raden  
Ureueng get beten teugoh seutia  
Beudoh keu adoe tameutuot  
Nyoe peue Si Ujut bila panglima

Adoe payong uleebalang  
Tapeugeundrang talet lingka  
Jinoe taek lingka peuet sagoe  
Tapoh si uroe nyoe kaphe cilaka

Lalu jiek ka meuree-ree  
Kapai siribee meuleulumba  
Oh sare rab ngon kapai Si Ujut  
Kaphe laknat tan agama

Janan meututo Malem Dagang  
Uleebalang dum jimeuhei rata  
Hoka gata-dumna rakan  
Nyang pahlawan teu nyang sasa

Tabeudoh jinoe rakan teungku  
Tameulakoe rata-rata  
Meung sare rab rakan teungku  
Beh tasrom saoh dalam behtra

Tatiek saoh rakan sineun lhee  
Bahle beuteuntee tapeukeumba  
Meung sare toe rakan tapeurab  
Bahle kulumpat u dalam behtra

Oh jideungo meunan areutoe  
Ban sinaroe geuek rata  
Oh sajan rab ngon raja kaphe  
Ureueng meuungki keu agama

Geutiek saoh nyan siseun lhee  
Janan ka teuntee geupeukeumba  
Peuet boh kapai sigo jipeurab  
Lalu jigrob dilee panglima

Sajan jigrob Raja Raden  
Ureueng get baten teugoh seutia  
Lalu jigrob di ulee kurong  
Jimplueng-plueng ngon panglima

Oh sare rab ngon raja Si Ujut  
Kaphe laknat tan agama  
Si Ujut jiduek di ateueh bale  
Jimeujunte jieu panglima

Raja Si Ujut that beurani  
Jiwet-wet gaki jieu panglima  
Oh sare toe Malem Dagang  
Jimeuteuntang ngon raja Guha

Si Ujut beudoh di ateueh bukot  
Jitajo jigrob jiteubiet u lua  
Jicok peudeueng di ateueh kurong  
Jikeubah sarong jimat meung mata

Kapeurab keunoe Malem Dagang  
Kapeurab bak reujang kah panglima  
Bak gob meugah aneuk tunong krueng  
Jinoe katheun rueng kutob di dada

Raja Si Ujut that beurani  
Ngon jinari langkah tiga  
Raja Si Ujut peuleumah areh  
Jimeutangkeh meuseusuka

Hana dawok Malem Dagang  
Jipeurab keunan bak raja Guha  
Malem jijak jareueng-jareueng  
Tapakji linteueng langkah tiga

Malem meugucab dua kalimat  
Keu poteu Allah han jilupa  
Ya ilahi wa ya rabbi  
Tuhanku neubri bak kaboi pinta

Ngon tilek Allah tulong Muhammad  
Beuek kumat kaphe cilaka  
Hana dawok Malem Dagang  
Jipeurab reujang bak raja Guha

Si Ujut tajo aneuk bisoe laloe  
Jikiloe ngon peudeueng raya  
Siseun jitak jipeusimban  
Peudeueng meukhan patah keudua

Lalu jimat di aweuek jaroe  
Si aneuk bisoe lalu jitampa  
Jimeureupah na sijamong  
Lalu jiseumpom ulee panglima

Sare reubah si aneuk bisoe  
Nyang boh taloe Raja Meulaka  
Bukon bubarang jiikat-ikat  
Ngon taloe kabat na bube pha

Bek that dalem kamoe taikat  
Bek bu tajrat tapeuseksa  
Bah meung bacut teu kuikat  
Kupeutok adat kume bak raja

Lalu jiba bak poteu Meukuta Alam  
Raja jimeunan Iskandar Muda  
Ampo tuanku syahi alam  
Seumah laman duli sroepada

Nyoe leu peue Si Ujut ka lam rante  
Deelat sambot le jinoe-sigra  
Nyoe leu peue Si Ujut lam taloe  
Udehta tawoe u Pulo Ruja

Lalu meusabda poteu Meukuta Alam  
Raja jimeunan Iskandar Muda  
Toh Si Ujut takheun lam rante  
Aneuk tabri kueu rupa

Tuanku ampon duli halarat  
Jeh pat lam gurab po meukuta  
Jeh pat lam kapai mubajee pirak  
Jeh pat meuhalak leumah nyata

Oh nan meuteumeung ngon Meukuta Alam  
Raja jimeunan Iskandar Muda  
Deelat tuanku meuribee ampon  
Seumah ulon pacai nyang hina

Pakri haba prang deelat meukatoe  
Peue areutoe po meukuta  
Peue haba prang nanggroe timu  
Di nanggroe Jho po meukuta

Nanggroe timu habeh ka talo  
Rakyat mate han teukira  
Rakyat mate oh soh nanggroe  
Kamoe pi muwoe u Pulo Ruja

Umu sibuleuen poteu sinan  
Meukeusukaan po meukuta  
Poteu meusabda bak Raja Si Ujut  
Kaphe kuyot tan agama

Katem hai raja buet nasihat  
Kupeusyahdan gata syeedara  
Bek le rakan taseumah mata uroe  
Rukon bek pujoe nabi Musa

Si Ujut deungo meunan areutoe  
Si aneuk bisoe ka beungeh raya  
Nyang ngon beungeh bukon bubarang  
Jimeulawan han teukira

Jimeulawan si aneuk jalang  
Bukon bubarang hana tara  
Bukon kreueh that Raja Si Ujut  
Buet nyang bacut jipeuraya

Geuboh rante jaroe gaki  
Geuikat le di ulee behtra  
Teuma cit narit raja Aseuhan  
Nyang jimeunan Raja Muda

Jak bu tawoe deelat meukatoe  
Jak bu tawoe po meukuta  
Raja Si Ujut ka lam rante  
Troph an page jeuet keu nama

Ka keu teutob malee po Meukuta Alam  
Habeh neugeunggam ban sigala donya  
Raja Muda pi ka jiwoe  
Poteu jinoe neumeusabda

Tacok saoh talinggang taloe  
Udehtawoe u Pulo Ruja  
Poteu teubiet laju u laot  
Beude neuyue tot kiam kabra

Jipaloe gong nyang ngon geundrang  
Jipeh ngon canang hareudom mama  
Bukon bubarang keusukaan  
Arak-arakan beurangkat raja

Siseun geuta leungo jihayak  
Lhee uroe jak tango suara  
Oh sare troh u teungoh laot  
Tihang seupot sang bak nala

Angen pi jipot seupoi-seupoi  
Meugeugasoi jiplueng behtra  
Jipot angen timu barat  
Behtra pi leugat u mieng kuala

Umu tujoh blah buleuen peulayaran  
Troph keu tuan u Pulo Ruja  
Poteu teunoh teuma u darat  
Dum ngon rakyat bala tantra

Si Ujut geucok di dalam laot  
Geuba u darat sigra-sigra  
Han ek mate si aneuk jalang  
That kreueh nyawong kaphe cilaka

Bukon bubarang larab that jipoh  
Beusoe saoh sideupa-deupa  
Padum geutron ngon geutampa  
Padum geusula lam-lam mata

Teuma geupeudeuk di babah meuriam  
Geupeuseunampang ngon ramtaga  
Padum geupasoe teuma dalam weng  
Geukitan ngon karong nyang raya-ray

Meunan pi jan cit ek mate  
Gundah keu ate po meukuta  
Han neutukri po raja Si Ujut  
Kaphe kuyot tan agama

Padum teuma geugogajoe  
Meuribee peue geupeuseksa  
Meunan pi han cit ek mate  
Jipeugah kri mawot teuka

Ulon bek that taadeueb tuan  
Bek that tuan tapeuseksa  
Baranggakri tapeulakoe nyan  
Han meunan ulon pahna

Tataguen timah meung saboh beulangong  
Taple lam reukueng na meung pahna  
Oh geudeungo narit mumeunan  
Geucok le yoh nyan pantah sigra

Geutaguen timah dua beulangong  
Geuba keunan bak Raja Guha  
Oh sare geubot le beulangong timah  
Jihah le baba sigra-sigra

Ka keu geuple timah lam reukueng  
Lam-lam idong lam-lam mata  
Raja Si Ujut pi ka mate  
Mangat keu ate po meukuta

Woe keu rakyat dum u nanggroe  
Maseng-maseng woe u rumoh tangga  
Tamat hikayat Meukuta Alam  
Raja jimeunan Iskandar Muda

Lapan uroe buleuen lon peutamat  
Uroe meuhat rabu nama  
Nama buleuen jumadoi awai  
Watee loha lon peuleungka

Hajeurat nabi siribee lhee reutoh  
Lom meutamah sikureueng thon ka  
Insya Allah ka keu tamat  
Ulon harab keu Allah taala

Jakarta 31 Maret 1982

Disunting dari tek yang  
terdapat dalam "De Hikajat  
Malem Dagang "susunan  
H.K.J. Cowan (BKI th. 1937)

oleh

Drs. Ramli Harun

Get kuboh droeku lam uteuen  
Sajan hiweuen sideh kutapa  
Na meung kudong di nanggroe nyoe  
Kee siseun nyoe jadeh binasa

Teungoh kukaphe jiyue iuseulam  
Meung lham han le areuga  
Bujang jitron ka u pasi  
Lanja jiili u kuala

Ka jiteubiet lanja u laot  
Ka jipeurab bak panglima  
Di kuala kon jimeuhei ampon  
Jaroe jiseuon atueuh jeumala

Tuanku ampon deelat meukatoe  
Pane bu nanggroe halarat meulia  
Kukalon tajak that mupadan  
Ngon angkatan bala tantra

Kueu tuanku that meuteuntee  
Na siribee kapai taba  
Kamoe bujang nanggroe meu jeuoh  
Bit lheueng tujoh nanggroe gata

Kamoe jeuoh bukon le sageh  
Kamoe di Aceh di Pulo Ruja  
Takheun di barat gata tuanku  
Kueu di timu lagoe neuteuka

Kamoe bujang bit di timu  
Muwoe baro di nanggroe Guha  
Adak di timu deelat meukatoe  
Peue areutoe di snoepada

Kamoe nideh bit hai bujang  
Meujak peungan prang u Jho Lama  
Poteu neuprang keu nanggroe nyan  
Neuseutet keunan raja Guha

Poteu neuprang raja Si Ujut  
Neujak tuntot meunalee jiba  
Raja Si Ujut Ka habeh talo  
Di nanggroe Jho troh u nanggroe Guha

Jeh raja Jho ka lam talo  
Poteu puwoe u Pulo Ruja  
Jeh lam kapai mubajee pirak  
Jinoe geupeujak u Pulo Ruja

Bujang jideungo meunan areutoe  
Lalu jiwoe u kuala  
Sare leupah bak alangan  
Jiteungoh nibak nyan lanja bak raja

Ampon tuanku meuribee ampon  
Tango ulon kupeuhaba  
Bit na lam talo tuanku raja Jho  
Jinoe geupuwoe u Pulo Ruja

Allah hai bujang han kudong le  
Kubungka u gle ulam rimba  
Raja jibungka lanja u gle  
Dumji sare tuha muda

Tujoh uroe jibungka geumeuntam  
U gunong itam keudeh jihala  
Oh sare troh bandum u gle  
Jipioh le jimeuseuninya

Poteu di laot tujoh uroe tujoh malam  
Ureueng saboh han keunan teuka  
Teuma meusabda Meukuta Alam  
Raja jimeunan Iskandar Muda

Neumeusabda bak Malem Dagang  
Panglima prang that peukasa  
Pakri po Malem tateungoh u darat  
Tajak eu teumpat raja Meulaka

Tujoh uroe geutanyoe ka keunoe  
Hana meung sidroe pi na teuka  
Bek tuanku tateungoh u darat  
Bek taeu teumpat Raja Meulaka

Keureuna ureueng han saboh le  
Ka leupah u gle dum barang na  
Han saboh le nyan di nanggroe  
Ka jiboh droe ulam rimba

Poteu meusabda bak Malem Dagang  
Panglima prang guna biasa  
Tacok saoh talinggang taloe  
Asoe jaroe bungka udehta

Poteu teubiet ka u laot  
Beude pi jitot meugumpita  
Jiseupot gong nyan ngon geundrang  
Geupuh ngon canang hareudom mama

Gong jiseupot lagee geudumbak  
Suara meuhayak poteu bungka  
Jipot angen seupoi-seupoi  
Meugeugasoe jiplueng behtra

Tujoh uroe leulayaran  
Trok u Aseuhan po meukuta  
Ohnan kapai dum geubaroh  
Geulhom saoh di mieng kuala

Jitot beude nyan di laot  
Si uroe seupot hana reuda  
Ohnan jitot beude meuriam  
Suara pi lanam sigala donya

Teuma cit narit raja Aseuhan  
Nyang jimeunan Raja Muda  
Hoka gata bujang tujoh  
Tatron u baroh ulon nyawa

Saleh musoh jak prang nanggroe  
Saleh poteu woe di nanggroe Guha  
Beukit nyo poteu Meukuta Alam  
Mangat tatron dumteu rata

Teuma jitron dum u pasi  
Ka jiili u kuala  
Tujoh biduek tujoh sampan  
Jitron yoh nyan u kuala

Oh sare leupah bak alangan  
Meuteumeung yoh nyan ngon po meukuta  
Oh sare lheueh jimeuteumeung  
Lalu jiriwang sigra-sigra

Oh sare troh nyan u dalam  
Jingadab tuan ubak raja  
Syahi Alam tuanku ampon  
Neudeungo ulon kupeuhaba

Bukon geuprang deelat meukatoe  
Kon geuprang nanggroe hai sroepada  
Nyan keu beude deelat meukatoe  
Poteu neuwoe di nanggroe Guha

Nyan keu beude poteu Meukuta Alam  
Nyang mee geunggam alam donya  
Raja Si Ujut ka lam rante  
Deelat seunabe ka keu geuba

Kharollah that Meukuta Alam  
Ek neugeunggam ban sigala donya  
Ban jideungo haba mumeunan  
Jitron le yoh nyan ubak raja

Jiyue tron rakyat jareueng-jareueng  
Poteu jiyue ampeueng bala tantra  
Beureukah teubee meureuribec  
Meung boh kayee han teukira

Poteu neuek reujang-reujang  
Neujak pandang raja Guaha  
Peue bu lakoe gata bisoe  
Pakon jinoe na ri meura

Di gob pi le geumupiasan  
Han keu na ban meuse gata  
Pihak gata meuteukabo  
Bit raja Jho seumeuah ria

Si Ujut deungo meunan areutoe  
Si aneuk bisoe beungeh raya  
Allah hai Allah kupaban bah  
Teukeudirollah teuka masa

Lalu meusabda poteu Meukuta Alam  
Raja jimeunan Iskandar Muda  
Aneuk teungku Malem Dagang  
Panglima prang that peukasa

Udehta Malem tateungoh u darat  
Tajak eu teumpat raja Guha  
Get tateungoh Malem Samlakoe  
Tajak eu nanggroe di Jho Lama

Nanggroe Jho tuanku that rayeukek  
Lhee buleuen mudek gunong pi hana  
Hana sapat nyang na meueumpoh  
Tanojji jroh sape rata

Nanggroe Jho tuanku hireuen dahsyah  
Banda luah that hana tara  
Adak Si Ujut that keusukaan  
Sinan keurajeuen nyang that raya

Ampom tuanku syahi alam  
Seumah laman duli snoepada  
Bek tuanku tateungoh u darat  
Bek taeu teumpat raja Guha

Meung lheueh Si Ujut di dalam taloe  
Meuteumee woe u Pulo Ruja  
Masa umanat Pocut Putroe Phang  
Putroe Banang sambinoe rupa

Han neuberi geutanyoe tateungoh u darat  
Bak mupakat ngon po meukuta  
Ampon tuanku deelat meukatOE  
Tawoe u nanggroe jak udehta

Oh neudeungo meunan areutoe  
Aneuk jak tawoe dum beurata  
Janan jibeudoh Malem Dagang  
Panglima prang that peukasa

Hoka gata wali ngon karong  
Taeu jaroe lon di ateueh jeumala  
Tacok saoh talinggang taloe  
Dum geutanyoe bungka udehta

Habeh jibeudoh dumna rakyat  
Meurok pakat dumgeu bungka  
Geucok saoh geulinggang taloe  
Leuho uroe poteu bungka

Geuseupot gong geupel geundrang  
Geupel ngon canang hareudom mama  
Geupel meng-mong ngon keudangdi  
Surak deumpek dumgeu rata

Gong geuseupot lagee geudumbak  
Surak meuhayak meuseusuka  
Yoh masa nyan that keusukaan  
Rayeuk piasan beurangkat raja

Hai lem payong meugeugalak  
Geunta jihayak Cakra Donya  
Siseun geunta leungo jihayak  
Lhee uroe jak tanggoe suara

Tujoh uroe peulayaran  
Trok keu tuan nanggroe Meulaka  
Masa nyan kapai dum geubaroh  
Geulhom saoh ateueh kuala

Geulhom ngon saoh geulinggang ngon taloe  
Rakyat pioh droc jimeuseuninya  
Lalu meusabda Meukuta Alam  
Neuheu yoh nyan Ja ulama

Neumeusabda bak Ja Pakeh  
Guree nyang leubeh ulama raya  
Peue nanggroe nyoe Ja teungku droe  
Nyoe peue nanggroe geurasi nama

Ampon tuanku that gunawan  
Nyan jimeunan nanggroe Meulaka  
Sinoe tuanku mee tatuntot  
Mbah Si Ujut di nanggroe Meulaka

Malem cuba tot beude meung sigo  
Suara beutanggoe sigala donya  
Sajan jitot beude di laot  
Han soe sambot di dalam kuta

Lalu jimarit mbah Si Ujut  
Beude peue jitot di kuala  
Bujang katron nyan u pasi  
Jak kaili u kuala

Kungo beude meugeurupoh  
Pane musoh keunoe teuka  
Adak kon musoh jak prang nanggroe  
Saleh Si Ujut woe di nanggroe Guha

Saleh Si Ujut ka troh keunoe  
Ubak kamoe u Meulaka  
Raja Si Ujut that kharollah  
Lon ngon meugah hana tara

Meugah Si Ujut that samlakoe  
Geuprang nanggroe u Jho Lama  
Meugah jimuprang ngon ureueng Aceh  
Aneukku jadeh kheue guranta

Aneuk Aceh habeh jimuprang  
Habeh jitawan jitueng areuga  
Kri cit narit sidroe bujang  
Jikheun reujang bak raja Meulaka

Ureueng Aceh tuanku habeh jitawan  
Nyang meuhat tuan meung aneuk gata  
Ureueng Aceh tuanku habeh jipubloe  
Nyang meuhat geupeutalo meung aneuk gata

Oh jideungo areutoe meunan  
Yoh masa nyan beungeh raja  
Masa nyan beungeh bukon bubarang  
Jigeurantang hana tara

Pajan kaeu ban hai bujang  
Pajan kapandang kapeunyata  
Pat bu kango soe bu peugah  
Di kee bak kah kungo haba

Jakalee tan tuanku ban mupeugah  
Neukoh lidahmeu sroepada  
Han mee tuanku kamoe neupeuudeb  
Mubri ayeb keu sroepada

Bujang tatron nyan u pasi  
Jak taili u kuala  
Jakleh takalon bak ureueng Aceh  
Tapeusaheh raja Guha

Beukeusit nyo Si Ujut ka geupeutalo  
Bujang kawoe bak kamoe sigra  
Dami Si Ujut mee geurante  
Han mee kudong le di nanggroe Meulaka



PN BALAI PUSTAKA — JAKARTA

